

Pablo Corintocjārārē ojamꞥ'tāca pūrī ni'i

A'ti pūrī a'tiro weero ojano'pā nise ni'i

Pablo Jesucristore ějōpeorā Corintocjārārē ojacꞥ niwī. Cũ ojacaterore Ēfesopꞥ nicꞥ niwī. Cũta Corintocjārārē ne waropꞥre Jesucristo ye quetire were, cūrē ějōpeori curuacjārā sājācā weecꞥ niwī.

Titare cũ Jesucristo ye quetire bu'esijanꞥ'cāca be'ro pꞥati wa'aro weecaro niwā.

Topꞥre judío masā nerēwꞥaropꞥ bu'ecꞥ niwī. Cūrē topꞥ nigūrē cō'awīrōcā'cārā niwā. Titare Corintocjārā me'rā ni'cā cũ'ma ape cũ'ma deco tojacꞥ niwī.

Be'ro Corintocjārārē cũ bu'e'quere queoro weeticā tꞥ'ogꞥ, a'ti pūrīrē ojacꞥ niwī. Cũ ojawꞥaranojōta añudutinꞥ'cācꞥ niwī. Yap-atigꞥpꞥa Judeacjārā pajasecꞥorārē weetamuse cjasere, cũ basu de'ro weeatjere ucũyapaticꞥ niwā.

Pablo Corintocjārārē oja'que ni'i

¹ Yꞥ'ꞥ Pablo, Sóstenes me'rā mꞥsārē añuduti'i. Cũ quē'rā Jesucristore ějōpeogꞥ marī acaweregꞥ nimi. Ō'acũ cũ ꞥa'caranojōta yꞥ'ꞥre Jesucristo ye quetire weredutigꞥ besecũꞥcꞥ niwī. ² Yꞥ'ꞥ a'ti pūrīrē mꞥsā Corintopꞥ nirārē oja'a. Mꞥsā Jesucristore ějōpeorā Ō'acũ ya curuacjārārē oja'a. Mꞥsā Jesucristo me'rā nírā, Ō'acũ yarā

ni'i. Õ'acũ musãrẽ cũ yarã niato nígũ besecũ niwĩ. Nipe'tirocjãrã Jesucristore ãjõpeorãrẽ tojo besecũ niwĩ. Jesucristo nipe'tirã cãrẽ ãjõpeorã wiogũ nimi. Tojo nicã marĩ wiogũ nimi.

³ Õ'acũ marĩ pacũ, tojo nicã Jesucristo marĩ wiogũ musãrẽ añurõ weeato. Musãrẽ ejerisãjãcã weeato.

Õ'acũ Jesucristore ãjõpeorãrẽ weetamuse ni'i

⁴ Musã Jesucristore ãjõpeorã niyucã, Õ'acũ musãrẽ añurõ weecũ niwĩ. Cũ tojo weesere ã'agũ, cãrẽ e'catise o'onu'cũ'u. ⁵ Musã Jesucristo yarã niyucã, Õ'acũ musãrẽ cũ ye cjase nipe'tise añusere o'ocũ niwĩ. Tere o'ogu, musãrẽ cũ yere añurõ masĩcã weecũ niwĩ. Æpẽrãrẽ musã cũ ye quetire añurõ wereturiacã weecũ niwĩ. ⁶ Yu'u "Cristo musãrẽ añurõ weegusami", niwã. Cũ yarã sãjãcã, yu'u ní'caronojõta wa'awũ musãrẽ. ⁷ Tojo weerã musã Õ'acũ o'osere cõpe'ocã'a. Marĩ wiogũ Jesucristo a'tiatjere yucueri curare Õ'acũ musãrẽ o'ose dũ'sawe'e. ⁸ Cũ tutu-asere musãrẽ o'onu'cũgũsami. Cãrẽ ãjõpeocã weenu'cũgũsami. Téé a'ti mũmũco pe'ticãpũ tojo weedu'ugusami. Tojo weerã marĩ wiogũ Jesucristo a'ticã, bu'iri marĩrã nirãsa'a. ⁹ Õ'acũ cũ ní'quere queoro weemi. Cũta musãrẽ besecũ niwĩ. Cũ macũ Jesucristo marĩ wiogũ me'rã añurõ nidutigũ besecũ niwĩ.

Pablo Corintocjãrãrẽ "A'merĩ dũcawatiticã'nã" ní'que ni'i

¹⁰ Acawererã, Jesucristo dutiro me'rã musãrẽ a'tiro nigũti. Musã ni'cãrõnojõ wãcũña.

Musã ucũse me'rã ducawatiticã'ña. E'catise me'rã a'merĩ ucũña. Ni'cãrõnojõ wãcũ nisetiya. ¹¹ Yu'ure Cloé wãmetigo ya wi'icjãrã musã a'merĩ ï'asĩ'rĩtise quetire werewã. ¹² A'tiro werewã: "Masãnucũ mejecã dia'cũ wãcũsetiama", niwã. Musã a'tiro ucũaporo: "Ûsã Pablo ya curuacjãrã ni'i." Æpẽrã "Apolo ya curuacjãrã", "Pedro ya curuacjãrã", tojo nicã "Cristo ya curuacjãrã ni'i", niaporo. Tojo weerã no'o ãaro wãcũma'acã'poro. ¹³ Tojo wãcũticã'rõã'a. Marĩ Cristore ëjõpeorã ni'i. Tojo weerã ni'cã curuata ni'i. Marĩrẽ ducawaase marĩ'i. Yu'ũ Cristo niwe'e. Musã ye niatjere curusapũ wẽrĩbosatiwũ. "Pablöre ëjõpeorãrẽ wãmeyeno'rõsa'a", nino'ña marĩwũ. ¹⁴ Õ'acũrẽ e'catise o'o'o. Crispo, tojo nicã Gayo dia'cũrẽ wãmeyegũ, queorota weewũ. ¹⁵ Pãjãrã musãrẽ wãmeyecã, a'tiro nibopã: "Pablo cũ wãme me'rã ùsãrẽ wãmeyewĩ", nibopã. Tere nĩrã, yu'ure ëjõpeorã weebopã. No'opãcã tere weetiwũ. ¹⁶ Estéfanas ya wi'icjãrã quẽ'rãrẽ wãmeyewũ. Æpẽrãma wãcũnemotisa'a. ¹⁷ Yu'ure Cristo wãmeyedutigũ cũutiwĩ. Cũ musãrẽ yu'rũose queti pe'ere yu'ure weredutigũ o'ówĩ. Tere weredutigũ, masã añurõ na wãcũme'rĩse paca me'rã weredutitiwĩ. Yu'ũ tojo werecãma, Cristo curusapũ wẽrĩsere wãcũtibopã. Masã yu'rũono'tibopã.

Õ'acũ tutuasere, cũ masĩsere Cristo me'rã masĩno'o nise ni'i

¹⁸ Jesucristo ye queti a'tiro ni'i. Cũ marĩrẽ yu'rũosĩ'rĩgũ, curusapũ wẽrĩcũ niwĩ. Tereta

Jesucristore ějōpeotirā pecame'epu wa'ajā a'tiro nisama cū wērī'quere: “Tojo nima'acārō wee'e”, nisama. Marī cū yu'rūono'cārā pe'ema Cristo curusapu wērī'que queti añuse ni'i. Te queti me'rā Ō'acū tutuasere ĩ'ano'o. ¹⁹ Ō'acū ye queti ojāca pūrīpure a'tiro ojano'wū:

Āpērā “Ěsā masīrā ni'i”, nirāsama.

Na tojo ucūserere pe'ticā weeguti.

Na tu'omasīserere tuumajāminu'cōcūti, nicu niwī Ō'acū.

²⁰ Tojo weerā “Masīpe'ocā'a” nirā mejō nirā tojama. Tojo nicā āpērārē na wācūserere bu'eri masā quē'rā mejārōta tojama. A'ti umuco cjasere ucūme'rīrā quē'rā mejārōta tojama. A'te, a'ti umuco cjase na “Tu'omasī'i” nisere Ō'acū a'tiro weesami. Tere mejō nise waro wa'acā weesami. ²¹ Ō'acū nipe'tisere masīmi. Tojo weegu cū a'ti turicjārārē na tu'omasīse me'rā cūrē masīcā weeticu niwī. A'tiro pe'e uacu niwī. Na Jesucristo ye quetire tu'orā, na ějōpeocā, “Narē yu'rūoguti”, nicu niwī. Cūrē ějōpeotirā pe'e te quetire tu'orā, “Tojo nima'acārō wee'e”, ni wācūcārā niwā.

²² Judío masā Ō'acūrē ějōpeose dūporo a'tiro nisama: “Ō'acū tutuaro me'rā weē'ocā ĩ'atojarāpu dia'cū ějōpeorāti”, nisama. Judío masā nitirā griego masā pe'e quē'rā a'ti turicjārā na wācūme'rīsere ějōpeoma. ²³ Ěsā pūrīcā Cristo curusapu wērī'cu ye quetire were'e. Judío masā tere tu'orā, tu'satisama. Judío masā nitirā quē'rā te quetire tu'orā, “Tojo nima'acārā weema”, nisama. ²⁴ Marī Ō'acū bese'cārārē

no'o judío masârê, judío masã nitirârê Jesu-
cristo ye queti ni'cârônojõ ni'i. Marĩ Cristo
curusapũ wêrĩse me'rã a'tiro masĩ'i: "Õ'acũ
tutuagũ, masĩyũ'rũagũ nimi", ni'i. ²⁵ A'ti
ũmũcocjãrã Õ'acũ weesere tojo weema'asere
weronjõ wãcũma. Niwe'e. Õ'acũ weese pe'eta
masã masĩse nemorõ niyũ'rũnũ'cã'a. Apeye
Õ'acũ wee'quere tutuatĩsere weronjõ ĩ'ama.
Niwe'e. Cũ wee'que pe'eta masã weese yũ'rũoro
tutuanemo'o.

²⁶ Acawererã, mũsârê Õ'acũ beseatji dũporopũ
niseti'quere wãcũña. Mũsã pejetirãcã a'ti
turi cjasere masĩrã waro niwũ. Pejetirãcã
wiorã niwũ. Pejetirãcã wiorã acawererã niwũ.
²⁷ Cũ a'ti turi cjase masĩrârê bopoyadutigũ
na "Tũ'omasĩtirã nima" nirãnojõrê besecũ
niwĩ. Tojo nicã tutuarârê bopoyadutigũ tu-
tuatirã pe'ere besecũ niwĩ. ²⁸ Cũ mejõ
nirã masã yabino'rârê besecũ niwĩ. Cũ tojo
weecã, wiorã mejõ nirã tũ'oña'to nígũ tojo
weecũ niwĩ. ²⁹ Tojo weegũ Õ'acũ ĩ'orõpũ ne
ni'cũ "Yũ'ũ ãpẽrã yũ'rũoro masĩyũ'rũnũ'cã'a",
nímasĩtisami. ³⁰ Mũsârê Õ'acũ basuta Jesu-
cristo yarã sãjãcã weecũ niwĩ. Tojo nicã
Cristo me'rãta marĩ masĩse cuo'o. Cũ me'rãta
tja Õ'acũ marĩrê "Na añurã, yũ'rũono'cãrãpũ
nima", ni ĩ'asami. Marĩ cũ yarã ni'i. Tojo weegũ
marĩ pecame'epũ wa'abo'cãrãrê yũ'rũweticã
weecũ niwĩ. ³¹ Tojo weero Õ'acũ ye queti
ojãca pũrĩpũ oja'caronjõta ni'i: "Ni'cũ 'Ãpẽrã
yũ'rũoro niyũ'rũnũ'cã'a' nisĩ'rĩgũ, niticã'to. Tojo
wãcũrõnojõ o'ogũ, marĩ wiogũ pe'ere 'Tu-

tuayurugũ nimi, marĩrẽ añubutiaro weecu niwĩ', niato", ni ojanowũ.

2

Cristo curusapũ wẽrĩ'que queti ni'i

¹ Yũ'u musã tiropũ Õ'acũ ye quetire weregu etagu, a'tiro weewũ. Pacase ucũse di'apaca me'rã masã na masĩse me'rã weretiwũ. ² Yũ'u musã tiropũ nígũ, a'te dia'cũrẽ wãcũnrũwũ: "Jesucristo ye queti, tojo nicã cã curusapũ wẽrĩ'que dia'cũrẽ wereguti", ni wãcũwũ. ³ Yũ'u musã tiropũ nígũ, mejõ nigũ tũ'oña'wũ. Apetero yũ'u te quetire queoro weretibosa'a nígũ, narãsãcũcãti. ⁴⁻⁵ Yũ'u musãrẽ ãjõpeocã uagu, masĩrã ucũwũase me'rã ucũtiwũ. Õ'acũ tutuase, cã masĩse o'ose me'rã ãjõpeoato nígũ ucũwũ. Tere ucũgũ, Õ'acũ tutuaro me'rã, Espĩritu Santu me'rã pe'e ãjõpeocã weewũ. Musãrẽ masã wãcũwũaronojõ tũ'o ãjõpeocã uatiwũ. Tojo weegu tojo werewũ.

Õ'acũ cãrẽ masĩato nígũ Espĩritu Santure o'o'que ni'i

⁶ Tojo nimirã, apeterore ãsã a'tiro wee'e. Jesucristore añurõ ãjõpeorãma pacase masĩse paca me'rã were'e. Te masĩse paca a'ti turi cjase mejẽta ni'i. Tojo nicã wiorã a'ti turicjãrã ye mejẽta ni'i. Na masĩse maata pe'tirosa'a. ⁷ ãsã a'tere ucũrã, Õ'acũ ye pe'ere ucũrã wee'e. Cã masĩsere, masĩno'ña marĩmi'quere, masã ne waro tũ'oti'quere ucũ'u. A'ti turi weese duporo Õ'acũ te ya'yio'quere "A'tiro weeguti",

ni wācūyutojacu niwī. Marĩrē yu'ruoatjere, marĩ ɰ'musepu ninu'cūatjere wācūyucu niwī. Tereta ucū'u. ⁸ Ne ni'cūputa a'ti turicjũ wiogu a'tere tu'omasīticu niwī. Tu'omasīrā pūrīcā, Jesucristo marĩ wiogu añuyu'ruagure curusapu wējētibopā. ⁹ Ō'acũ ye queti ojāca pūrīpūre a'tiro pe'e ojano'o:

Ō'acũ cūrē mairārē añuse apoyucu niwī.

Na ĩ'ati'que, na tu'oti'que ni'i.

Na ne cārō wācūma'ati'que ni'i, ni ojano'o.

¹⁰ Te añuse marĩ masīti'quere Ō'acũ Espíritu Santu me'rā marĩrē masīcā weemi. Espíritu Santu nipe'tise diasayu'rūnū'cāsere Ō'acũ cū weesere masīpe'ocā'mi.

¹¹ Marĩ apĩ cū wācūserere masīwe'e. Cū se'saro cū wācūserere tu'oña'sami. A'te weronojō Espíritu Santu se'saro Ō'acũ cū wācūserere masīmi. ¹² Marĩ a'ti ɰmucocjārā Jesucristore ējōpeotirā weronojō wācūwe'e. Ō'acũ marĩrē Espíritu Santure o'ocu niwī. Tojo weerā cū weronojō wācūse cuo'o. Cū me'rā nipe'tise Ō'acũ marĩrē o'o'quere masī'i. ¹³ Ūsā a'tere ucūrā, Espíritu Santu bu'e'que ɰseri me'rā ucū'u. Ūsā basu masīmujāti'que me'rā mejēta ucū'u. Tojo weerā ūsā Espíritu Santure cuorā cūrē cuorārēta bu'e'e.

¹⁴ Espíritu Santure moogũ a'tiro weesami. Ō'acũ ye cjasere, Espíritu Santu bu'esere ɰatisami. “Tojo nima'acārō wee'e”, nisami. Espíritu Santu me'rā marĩ Ō'acũ yere masī'i. Tojo weegu cūrē moogũ Ō'acũ yere “Tojo nirō

wee'e", ni tɔ'omasītisami. ¹⁵ Espíritu Santure cɔogɔ pe'e nipe'tise bu'esere "¿Queoro niti?" ni besemasĩpe'ocã'sami. A'tiro weegure Espíritu Santure moogũ pe'e cã weesere besemasītisami. ¹⁶ Õ'acũ ye queti ojáca pũrĩpɔ a'tiro ojano'caro niwũ: "Ni'inojõta ne ni'cũ marĩ wioɔɔ wãcũsere masītisami. Ne Õ'acũrẽ 'Tojo ɔa'a' ni, duti-masītisami", ni ojano'wũ. Tojo nimicã, marĩ pe'e Cristo me'rã nĩrã, cã wãcũsere masĩ'i.

3

Pablo "Ësã Õ'acũrẽ da'raco'terã ni'i" nise ni'i

¹ Acawererã, mɔsã Espíritu Santure añurõ yɔ'tirã weronojõ nitiwɔ. Tojo weegɔ mɔsãrẽ diasasere wereta basiotiwɔ. A'tiro pe'e weewɔ. Mɔsãrẽ diasatise dia'cũrẽ werewɔ. A'ti turicjãrã Espíritu Santure moorã weronojõ niyucã, tojo weewɔ. Mɔsã Cristo ye cjasere añurõ ãjõpeotiwɔ. Tojo weegɔ mɔsãrẽ wĩ'marãrẽ ucũgũ weronojõ werewɔ. ² Wĩ'marã a'tiro weesama. Õpẽrĩ du'utirã, õpẽcõ dia'cũ mi'rĩsama. Narẽ ba'asere ecatisama. Bu'ese ba'ase ecase weronojõ ni'i, nisĩ'rĩrõ wee'e. Wĩ'marãrẽ õpẽcõ mi'orõ weronojõ mɔsãrẽ a'tiro weewɔ. Mɔsãrẽ diasatise bu'icjasere bu'ewã'cõwũ. Yɔ'u diasasere mɔsãrẽ bu'ecãma, põtẽoti wãcũejatibopã. Mejãrõta ni'cãrõacãrẽ yɔ'u pacase pacare bu'ecã, tɔ'otibosa'a. ³ Mɔsã Jesucristore ãjõpeotirã weronojõ ni'i yujupɔ. Mɔsã a'merĩ ɔo'o. A'merĩ ã'asĩ'rĩwe'e. Tojo weerã Jesucristore ãjõpeotirã a'ti turicjãrã weronojõ wee'e. ⁴ Mɔsã a'tiro ucũ'u: "Yɔ'u

Pablo ya curuacjũ ni'i." Apĩ "Yũ'u Apolo ya curuacjũ ni'i", nisa'a. Tojo nĩrã, a'ti turicjãrã weronojõ ucũrã wee'e.

⁵ Yũ'u, Apolo me'rã ũsã mejõ nirã ni'i. Õ'acũrẽ da'rawã'ñaco'teri masã ni'i. Tojo weerã ũsãrẽ "Na ya curuacjãrã ni'i", niticã'ña. ũsã werese me'rã musã marĩ wioꝝ Jesucristore ãjõpeowũ. ũsãñucũ Õ'acũ wereduti'quere werewũ. ⁶ Yũ'u ne waro musãrẽ werewã'cõwũ. Ni'cũ otese ðucare oteꝝ weronojõ weewũ. Be'ro Apolo musãrẽ bu'enemopeocũ niwĩ. Otesere aco pio'cũ weronojõ weecũ niwĩ. Õ'acũ pe'e tere pĩ'rĩ bu'cuamujãcã weecũ niwĩ. Tere wééꝝ, musãrẽ nemorõ ãjõpeocã weecũ niwĩ. Nemorõ cũ ðaro weecã weecũ niwĩ. ⁷ Otese ðucare oteꝝ, tojo nicã aco pioꝝ mejõ nirã nima. Õ'acũ pũrĩcã tere pĩ'rĩcã weegú cũ waro nimi. ⁸ Weremũ'tã'cũ, be'ro cũrẽ bu'esirutuꝝ quẽ'rã ni'cãrõnojõ nima. Õ'acũ nãñucũrẽ queoro na wee'quere wapayegũsami. ⁹ ũsã Õ'acũ yarã ni'i. Cũrẽ ni'cãrõnojõ da'raco'te'e. Musã cũ da'rari di'ta weronojõ ni'i.

Tojo nicã wi'i cũ yeewã'cãrĩ wi'i weronojõ ni'i. ¹⁰ Yũ'u Õ'acũ weetamuse me'rã musãrẽ bu'éꝝ, a'tiro weewũ. Wi'i nũ'cõme'rĩrĩ masũ weronojõ musãrẽ añurõ bu'enũ'cãwũ. ãpẽrã musãrẽ bu'enemorã, ti wi'ire weeturiamujãrã weronojõ weerã weema. Ti wi'ire yapada'reosĩ'rĩrã, añurõ weeroũ'a. ¹¹ Õ'acũ masãrẽ yũ'rũodutigu Jesucristore cũucũ niwĩ. Cũ ni'cũta masãrẽ yũ'rũoꝝ nimi. Yũ'u musãrẽ te quetire bu'enũ'cãwũ. Ne apĩ, Õ'acũ tojo cũunũ'cã'que

Jesucristo ye quetire ducayumasītisami.
 12 Wi'ire wéerã, a'tiro weeno'o. Uru, platanojō me'rã, ũtãperi wapabujuse me'rã yeebu'ipeono'o. Āpērã yucu me'rã, pūrĩ me'rã, ārũpagu me'rã weemasĩno'o. A'te weronojō ni'cũ añuse warore musārē bu'ebosami. Apĩ mejō nise maata pe'tisere bu'ebosami.
 13 A'ti umuco pe'ticã, Ō'acũ nánucūrē na bu'e'quere bajuyoropu besegusami. Ni'cũ urure pecame'epu besegu weronojō weegusami. ¿Na añurō o ña'arō pe'e bu'epari? nígu, tojo weegusami. 14 Ni'cũ āpērārē añurō bu'eturiamujã'que ninu'cũcã'rōsa'a. Ni'cã wi'i ũtã wapabujuse me'rã yéeca wi'i ũjũtiro weronojō ninu'cũrōsa'a. Ō'acũ cũ da'ra'quere wapayegusami. 15 Apĩ añurō bu'eturiawã'cãtigu pe'ere cũ bu'e'que pe'tia wa'arosa'a. Pūrĩ me'rã wéeca wi'i weronojō ũjũdija wa'arosa'a. Cũ ti wi'i ũjũrĩ cura du'tiwijaa'cu weronojō nigũsami. Cũ ye nipe'tise ũjũpe'tia wa'arosa'a. Cũ ni'cũta pecame'epu wa'abo'cu yu'rũwetigusami.

16 ¿Musã masĩweti? Musã Ō'acũ wi'i weronojō ni'i. Espíritu Santu musãpũre nimi. 17 Musārē “Ō'acũ wi'i weronojō ni'i” nírō, cũ yarã waro ni'i, nisĩrĩrō wee'e. Tojo weegu Ō'acũ cũ yarārē do-jorēcã weegure pecame'epu bu'iri da'regusami.

18 Musã basu a'tiro wãcũma'aticã'ña: “Yu'u a'ti umucocjãrã wãcũwũaro weronojō masĩyu'rua'a”, niticã'ña. A'tiro pe'e niña. “Ne masĩtisa'a”, niña. Tojo ucũgũ pũrĩcãrē Ō'acũ masĩgũ waro wa'acã weegusami. 19 A'ti umucocjãrã na “Tu'omasĩ'i” nise Ō'acũ ĩ'orõpũre

tojo weema'ase ni'i. Õ'acũ ye queti ojáca pūrĩpũ a'tiro ni ojanowũ: "A'ti turicjārã na masise me'rã 'Weerãti' nirãrẽ Õ'acũ na wãcũsere tuumajãminũ'cõcã'sami", ni ojanowũ. ²⁰ Aperopũ quẽ'rãrẽ Õ'acũ ye queti ojáca pūrĩpũre a'tiro ojanemonowũ: "Marĩ wiogũ a'ti umucocjārã wãcũsere masimi. Na masisere ĩ'agũ, 'Mejõ nise ni'i', nisami", ni ojanowũ. ²¹ Tojo weerã musãrẽ bu'egũre "Ãpẽrã yũ'rũoro nimi", niticã'ña. "Yũ'u Pablo ya curuacjũ ni'i", niticã'ña. Õ'acũ musãrẽ añurõ wa'acã uagũ, a'tiro weecũ niwĩ. Nipe'tisere o'ocũ niwĩ. ²² Yũ'ũre, Apolore, Pedrore musãrẽ weetamudutigũ o'ócũ niwĩ. Tojo nicã a'ti turi cjasere, marĩ catisere o'ocũ niwĩ. Apeye, wẽrĩca be'ro catinu'cũatjere o'ocũ niwĩ. Nipe'tise musã ye ni'i. ²³ Apeye quẽ'rãrẽ musã Cristo yarã ni'i. Tojo nicã Cristo quẽ'rã Õ'acũ yagũ nimi.

4

Jesucristo ye quetire wererã na weeseti'que ni'i

¹ Ûsãrẽ musã a'tiro wãcũrõũa'a. "Cristore da'rawã'ñaco'teri masã nima", nirõũa'a. Ûsã Õ'acũ ye queti toduporocjārã masĩti'quere wereco'terã ni'i. ² Marĩ da'rase cũorã, marĩ wiogũ duti'caronojõta queoro weerõũa'a. Tojo weecã, marĩrẽ ãjõpeosami. ³ Musã yũ'ũre "Pablo Õ'acũ cjasere añurõ da'rami" nicã o niticã, sõ'owaro wãcũque'tiwe'e. Mejãrõta wiorã na besewũaropũ miacã quẽ'rãrẽ, wãcũque'tiwe'e. Yũ'u basu waro quẽ'rã besewe'e. ⁴ Yũ'u da'rasere ña'arõ tũ'oña'tisa'a.

Tojo nimigũ, “Te añu ni'i”, nímasĩtisa'a. Marĩ wioḡu dia'cũ yu'u weesere besesami. ⁵ Tojo weerã ãpẽrã wee'quere beseyuticã'ña. Marĩ wioḡure yucueya. Cũ a'tigũ, nipe'tise masã masĩti'que ya'yioropũ ní'quere bajurẽḡũsami. Masã na wãcũrõpũ “A'tiro weeguti” ní'que quẽ'rãrẽ ï'ogũsami. Ti nũmũ nicã Õ'acũ nánucũ añurõ weeseti'quere “Queoro añurõ weewũ”, nigũsami.

⁶ Acawererã, añusere mũsãrẽ uasã'a. Tojo weegũ Apolo, yu'u, ùsã ye cjase me'rã mũsãrẽ queose o'oapũ. Ësã weronojõ ni'cãrõ me'rã niato nírã tojo weepũ. Ësã weesere ï'acũña. Tojo wéerã, mũsã Õ'acũ ye queti ojãca pũrĩpũ nírõnojõta weerãsa'a. Ti pũrĩpũ dutítisenojõrẽ yu'rũoquejosome. Tojo nicã “Ësãrẽ bu'egũ pe'e masĩyu'rũnũ'cãmi mũsãrẽ bu'egũ yu'rũoro”, nisome.

⁷ Mũsã ãpẽrã nemorõ añurã niwe'e. Masĩyu'rũnũ'cãrã niwe'e. Nipe'tise mũsã cõose Õ'acũ o'o'que dia'cũ ni'i. Cũ o'óca be'ro nimicã, to pũrĩcãrẽ ¿de'ro weerã mũsã basu boca'caro weronojõ tu'oña'ti? ⁸ Mũsã a'tiro wãcũ'u: “Nipe'tisere cõope'ocã'a, ñe'enojõ du'sawe'e”, nisa'a. Ësã topũ nitiri cura mũsã wiorã masĩyu'rũnũ'cãrã weronojõ tu'oña'sa'a. “Nipe'tisere masĩpe'ocã'a”, nisa'a. Tojo nírã, ùsã pe'ere tojowaro ï'acõ'asa'a. Mũsã diacjũta wiorã nicã pũrĩcãrẽ, añuyũ'rũabosa'a. Ësã quẽ'rã mũsã me'rã wiorã nitamubosa'a. ⁹ Yu'u a'tiro pe'e tu'oña'a. Õ'acũ ùsãrẽ Jesucristo besecũú'cãrãrẽ nipe'tirã docapũ mejõ nírã

mejārã cūu'caro weronojō tū'oña'a. Ɖsã wējēcō'ano'ajã weronojō ni'i. Nipe'tirã, a'ti di'tacjārã, u'musecjārã ũsã pi'eticã ĩ'asama. ¹⁰ Cristo ye quetire werecã, a'ti nucūcãcjārã ũsãrē “Tū'omasītirã nima”, nisama. Mũsã pe'e “Cristo ye quetire masīpe'ocã'a”, nisa'a. Ɖsã mũsã ĩ'acãta, tutuawe'e. Mũsã pūrĩcã “Ɖsã tutuarã ni'i”, nisa'a. Masã ũsãrē tojo ĩ'acō'acã'ma. Mũsã pe'ere wiopesase me'rã ĩ'asama. ¹¹ Ne waroputa ũsã pi'etinũ'cãwũ. Ni'cãrōacã quē'rãrē tojota yapaticã'a. Ɖjaboa'a, acowuo'o, su'ti moo'o. Masã ũsãrē tãrãpema. Wi'i ũsã ya wi'i waro moo'o. ¹² Ɖsã ba'asĩrĩsenojōrē, ũsã su'ti sãñasĩrĩsenojōrē duusĩrĩrã, a'tiro wee'e. Ɖsã basu ũputu da'ra pi'eti'i. Masã ũsãrē ña'arō ucũcã, narē ũsã pe'e “Añurō wa'ato”, ni sērĩbosa'a. Ɖsãrē ña'arō weecã, tojo tū'oña'cã'a.

¹³ Masã ũsãrē ña'arō ucũcã, narē añurō me'rã apome'ricã'a. A'ti ũmũco cjase na cō'a'que, na ũatisere weronojō ũsãrē ĩ'ama. Ne waropu tojo yabinũ'cã'cãrã mejãrōta yabinu'cũma tja. ¹⁴ Mũsãrē bopoyadutigu mejēta oja'a. Mũsãrē yu'u ma'ĩgũ, yu'u pō'rãrē weronojō queoro wãcũcã ũagu wereme'ricã'a.

¹⁵ Mũsã pãjãrã diez mil Cristo ye quetire bu'erã cūorã, cūomasĩ'i. Tojo pãjãrã cūota basiomicã, ni'cũta nisami mũsãrē weremu'tã'cu. Te Jesucristo masãrē yu'rũogũ a'ticu niwĩ nise quetire yu'uta weremu'tãwũ. Mũsã te quetire tũ'orã, cũrē ĩjōpeonũ'cãwũ. Tojo weegu yu'u mũsã pacu weronojō ni'i. Mũsã quē'rã yu'u pō'rã weronojō ni'i. ¹⁶ Tojo weegu mũsãrē

a'tiro weecã ɯa'a. Yũ'u weesetisere ï'acũu weesirutuya. ¹⁷ Yũ'u tere ɯasãgũ, Timoteore musã tiropũ o'ógũ wee'e. Cũrẽ ma'i'i. Cũ yũ'u macũ weronojõ nimi. Marĩ wiogũ yere queoro weenu'cũmi. Yũ'u Cristore ẽjõpeogũ weesetisere cũ musãrẽ weregũsami. Yũ'u nipe'tirã Cristore ẽjõpeorãrẽ, nipe'tiropũ nirãrẽ were'quenojõrẽta weregũsami. ¹⁸ Ni'cãrẽrã musã a'tiro wãcũsa'a: “Ësã ãpẽrã nemorõ añurõ weeyũ'rũnũ'cã'a”, nisa'a. Tere nĩrã, “Pablo a'tisome”, ni wãcũsa'a.

¹⁹ Yũ'u pe'e “Õ'acũ ɯacã, maata musã tiropũ wa'agũti”, ni wãcũ'u. “Topũ wa'agũ, na tojo ni ucũrãrẽ ï'agũti”, ni'i. Te se'sarore ï'asome. “‘¿Na Õ'acũ tutuase me'rã weetina?’ ni ï'agũti”, ni'i. ²⁰ Õ'acũ wiogũ nise a'tiro ni'i. Cũ ɯaro, cũ tutuaro me'rã weecã ɯami. Ucũse ɯseri me'rã dia'cũ yũ'ticã ɯatimi. ²¹ ¿Ñe'erẽ ɯasari musã? ¿Yũ'u musã tiropũ wa'agũ, ña'arõ weese wapa musãrẽ tu'ticã ɯasari? ¿O añurõ weese wapa pe'e ma'ise me'rã wereme'rĩcã ɯasarine?

5

Ña'arõ weegũre cõ'awĩrõdutise ni'i

¹ Musã ye queti a'topũ busũtu'o'o. Tere tu'ogũ, tu'omarĩawũ. A'tiro tu'o'o. Ni'cũ musã me'rãcjũ cũ pacũ ɯuorẽ'core ẽ'ma, ɯmotiarpũ. A'tiro weesere Õ'acãrẽ ẽjõpeotirãpũta ne weetima. Ña'ayũ'rua'a. ² Musã “Ãpẽrã nemorõ añurõ weeyũ'rũnũ'cã'a”, ¿niti yujupũ? Bũjawetironojõ o'orã, musã bũjawetitiwũ. Bũjawetirã pũrĩcã, cũrẽ cõ'abopã. Musã me'rã

nerēnemodutitibopã. ³ Yu'u a'topu nimigũ, yu'u wãcũse me'rã musã tiropu nígũ weronjõ tu'oña'a. Tojo weegu cũ ña'arõ weegure musã me'rã nigũrẽ "Cõ'arõua'a", nitoja'a. ⁴ Marĩ wiogu Jesucristo dutiro me'rã musãrẽ nerẽduti'i. Yu'u quẽ'rã yu'u wãcũsepũ musã tiropu nitamugũti. Marĩ wiogu Jesú quẽ'rã cũ tutuase me'rã musã tiropu nigũsami. ⁵ Musã tojo nerẽrã, pacu nuorẽ'core numotigure cõ'acã'ña. Wãtĩ cũ upure de'ro weesĩ'rĩgũ weeato nĩrã tojo du'ucã'ña. Tojo weecã, cũ upu pi'etirosa'a. Tojo pi'etigu, cũ ña'arõ weesere du'ubosami. Cũ tojo wéeca be'ro marĩ wiogu Jesú a'ti turipu a'tigu, cūrẽ yu'ruogusami.

⁶ Ña'arõ weegú musã wa'teropu nisami. Tojo weerã "Ûsã pe'e ãpẽrã yu'ruoro añurõ weeyu'runu'cã'a", niticã'ña. Ña'arõ weesere nipe'tirã pẽ'rĩpejatawio ni'i. ¿Musã a'tiro niwuasere masĩweti? "Pã wéerã bucuato nĩrã levadura wãmetisere morẽsama. Na cã'rõacã morẽca be'ro te nipe'tiropu se'sa wa'asa'a", nino'o. A'te weronjõ masã na ña'arõ weesere pẽ'rĩpeja wa'asama. ⁷ Tojo weerã pẽ'rĩpejari nĩrã, te ña'ase dojorẽsere cõ'acã'ña. Tere cõ'arã, musã añurã tojarãsa'a. Judío masã Pascua bosenuũ duporo pã bucuase me'rã morẽ'quere cõ'asama. Ti bosenuũrẽ morẽña marĩse dia'cūrẽ ba'asama. Te weronjõ musã a'tiro weerãsa'a. Ña'ase dojorẽsere cõ'arã, pã morẽña marĩse weronjõ tojarãsa'a. Añurã tojarãsa'a nitiroma, añurã nitoja'a. Cristo cũ basuta marĩ ña'arõ weesere cõ'agũ wẽjẽno'tojacu niwĩ. Cũ

Pascua nicã oveja na wějě'cu weronojõ nimi. ⁸ Tojo weerã toduporo ña'arõ weeseti'quere du'uroña'a. Diacjũ weesooro marĩrõ weesetiroña'a. Ña'arõ weesetiro marĩrõ nirõña'a.

⁹ Yũ'u toduporo ojamũ'tãca pũrĩpu a'tiro ojawũ. "Numiarẽ a'metãrãbajaque'atirã me'rã ba'patiticã'ña", ni ojawũ. ¹⁰ Yũ'u tojo ojawũ, "A'ti turicjãrãrẽ ba'patitibutiãcã'ña", nigũ mejëta weewũ. A'ti turipure no'o ñaro weeri masã nima. A'metãrãrĩ masã, ñaripejasebucurã, yajari masã, Õ'acũ mejëtare ëjõpeoma'arĩ masã nima. Yũ'u tojo nibutiaca be'ro nicãma, musã no'o wa'arã wa'abopã. ¹¹ Yũ'u a'tiro pe'e niwũ: "No'o 'Jesucristore ëjõpeo'o' nimigũ, ña'arõ weegũ me'rã ba'patiticã'ña. A'metãrãgũnojõrẽ, ñaripejagũnojõrẽ, no'o queose yee'quere ëjõpeoma'agũnojõrẽ ba'patiticã'ña. Tojo nicã ña'arõ tu'tisepijagure, que'asebucure, yajari masũrẽ ne ba'patiticã'ña. Ne cã'rõ na 'Jesucristore ëjõpeo'o' nimirã, ña'arõ weerã me'rã ba'aticã'ña", niwũ. ¹²⁻¹³ Yũ'u Jesucristore ëjõpeotirãrẽ bu'iri da'rewe'e. Õ'acũ cũ basu narẽ bu'iri da'regusami. Musã pũrĩcã musã me'rã nirãrẽ na ña'arõ weecã, bu'iri da'reya. Õ'acũ ye queti ojãca pũrĩ oja'caronojõta weeya. A'tiro ojano'wũ: "Ni'cũ musã wa'tero nigũ ña'arõ weegure cõ'awĩrõña", niwũ. Tojo weerã cãrẽ cõ'acã'ña.

6

Jesucristore ëjõpeorãrẽ mejëcã wa'acã, weresãtirãta a'merĩ apoya nise ni'i

1 Jesucristore ějōpeorã na me'rãcjãrã me'rã uarãnojō a'tiro weesama. Beseri masã Jesucristore ějōpeotirã tiropu besedutirã wa'asama. Tojo weeticã'rōua'a. Musã me'rãcjãrã Jesucristore ějōpeorãrẽ besedutiroua'a. 2 Musã masĩsa'a. A'ti turi pe'tica be'ro Jesucristo yarã a'ti turicjãrãrẽ beserãsama. Musã a'ti turicjãrãrẽ beserãsama nĩrã, to pũricãrẽ ĵde'ro weerã a'teacãrẽ besemasĩweti? 3 ĵMusã masĩweti? A'ti umuco pe'ticã, marĩ Ō'acũrẽ wereco'terã u'musepu nimi'cãrã quẽ'rãrẽ beserãsa'a. Tojo beserãsa'a nĩrã, a'ti umuco cjase musã du'saso'quema tjãsa'a. 4 A'ti umuco cjase mejō nise me'rã musã a'merĩ ua'a. Teacã me'rã uarã, a'tiro wee'e. Musã beseri masãrẽ "Mejō nirãnojō nima" nimirã, na tiropu besedutirã wa'a'a. 5 A'tema musãrẽ bopoyato nĩgũ tojo ni'i. ĵMusã wa'teropure ne ni'cũ masĩgũnojō a'tere beseacju marĩbutiati?

6 Nicãma, cũrẽ besedutironojō o'orã, Jesucristore ějōpeotirã tiro pe'e musã me'rãcjãrãrẽ weresãrã wa'a'a. Tojo weecã ĵaũu niti musãrẽ? 7 Musã basu a'merĩ uarã, tojo weema'acãrã wee'e. Musãrẽ ña'arō weesere tojo tu'oña'cã, nemorō añubosa'a. Narẽ weresãrõnojō o'orã, na yajasere ya'yiosãrã, tojo tu'oña'cãña. 8 Musã basuta Jesucristore ějōpeorã musã acawererãrẽ ña'arō wee'e. Na yere yajasa'a.

9 ĵMusã masĩweti? Ña'arō weerã Ō'acũ tiropu wa'asome. Musã wãcũma'aticã'ña. A'tiro wéerã, u'musepure wa'asome. Ma'mapjia no'o uaro a'metãrãbajaque'atirãnojō wa'asome. No'o queose yee'quere ějōpeoma'arãnojō

wa'asome. Nūmotirā, marāputirā āpērārē a'metārābajaque'atirānojō wa'asome. No'o ɯmɯa basu ña'arō weerānojō, numia basu ña'arō weerānojō ɯ'mūsepɯ wa'asome. ¹⁰ Tojo nicā yajari masā, ɯaripejasebucurānojō, que'asebucurā, tu'tisepiarā, weesoose me'rā yajari masā Ō'acū tiropɯ wa'asome. ¹¹ Toduporopure mūsā ni'cārērā a'tere tojota weeseticārā niwū. Ni'cārōacārē acobojo, ducayuno'cārāpɯ ni'i. Ō'acū yarā ni'i. Marī wiogɯ Jesú me'rā, tojo nicā Espiritu Santu me'rā Ō'acū mūsārē “Añurā nima”, ni ĩ'asami.

Marī upɯ Cristo ya upɯ ni'i nise ni'i

¹² Masā a'tiro ucūwɯasama: “Marī weesī'rīsere no'o ɯaro weemasī'i.” Tojota ni'i, nírō pe'e. Apeye marī weesī'rīse marīrē weetamutisa'a. Marī ɯaro weegɯ wee'e nígū, tere tojo weewā'ñaticārōɯa'a. ¹³ Apeye na ucūwɯase diacjū ni'i. A'tiro ni'i: “Ba'ase añu ni'i paagare. Paaga pe'e ba'asāacja ni'i.” Ō'acū pe'e a'te pɯaropure pe'ticā weegɯsami. Apeye pe'e diacjū niwe'e. Ō'acū upɯ wéégɯ, a'metārābajaque'atiati upure weeticɯ niwī. Marī ya upɯ Jesucristo ɯaro weeati upɯ ni'i. Cū ti upɯ wiogɯ nimi. ¹⁴ Ō'acū cū tutuaro me'rā marī wiogɯ ya upure masōcɯ niwī. Cūrē masō'caronojōta marī upure masōgūsamī.

¹⁵ ¿Mūsā masīweti? Mūsā ya upɯ, Cristo ya upɯ me'rā a'mesɯ'a'a. Marī tojo ni'i nírā, Cristo ya upure a'tiro weeta basiowe'e. A'metārāwapata'ari masō ya upɯ me'rā ti upure

a'mesũ'ota basiowe'e. ¹⁶ ¿Masĩweti? Õ'acũ ye queti ojáca pũrĩpũ a'tiro ojano'wũ: “Ûmũ, numio me'rã nígũ, na pũarã nimirã, ni'cã upũ weronojõ tojasama”, ni ojano'wũ. Tojo weerã müsã ña'agõ me'rã nírá, ña'arã tojasa'a. Co me'rã ni'cã upũ dojorã weesa'a. ¹⁷ Ni'cã Jesucristo marĩ wiogũ me'rã a'mesũ'agũ pe'ema, na pũarãpũta ni'cã upũ dojo, ni'cã wãcũse cũosama.

¹⁸ Ne ãpẽrãrẽ a'metãrãbajaque'atisere wãcũma'aticã'ña. Apeye marĩ ña'arõ weesere sõ'owaro marĩ upũ me'rã weetisa'a. Marĩ a'metãrãbajaque'atirã pe'e, marĩ upũ warore dojorẽrã wee'e. ¹⁹⁻²⁰ ¿Müsã masĩweti? Marĩrẽ Õ'acũ Espĩritu Santure o'ócũ niwĩ. Marĩ ya upũ Espĩritu Santu ya wi'i ni'i. Tojo weerã marĩ upũ me'rã no'o ñaro weemasĩwe'e. Jesucristo marĩrẽ ma'ígũ, cã yarã niato nígũ wẽrĩ wapayecũ niwĩ. Tojo weerã marĩ upũ me'rã Õ'acũ cã ñaro pe'e weemasĩ'i. A'tiro weecã, ãpẽrã cũrẽ añurõ wãcũrãsama.

7

Nũmotise cjase ni'i

¹ Ni'cãrõacãrẽ müsã sãrĩtiña'o'oca pũrĩrẽ yũ'tiguti. Nũmotiticã, marãpũtiticã añucã'a, añurõ pe'e. ² Tojo nimicã, topũre pãjãrã ãpẽrã no'o ñaro a'metãrãbajaque'atisama. Tojo weerã ãmũa nãnucũ nũmotirowã'a. Numia quẽ'rã nãnucũ marãpũtiroã'a. ³ Ûmũ cã nũmo me'rã añurõ nisetiato. Co quẽ'rã cã me'rã mejãrõta nisetiato. ⁴ Marãpũtigo a'tiro niticã'to: “Yũ'u ñaro weegoti”, niticã'to. Co

marāpū niyucā, “Cũ ɥaro weegoti”, niato. Nūmotigu quē'rā “Yũ'u ɥaro weeguti”, niticā'to. Cũ nūmo niyucā, “Co ɥaro weeguti”, niato. ⁵ Co a'tiro weeato. Co marāpū co me'rā nisī'rīcā, yu'tiatio. Cũ quē'rā core yu'tiatio. Ō'acūrē ñubuerātirā, ticuse nūmārī “Marī weewɥaranojō weeticā'rā” ni apóca be'ro pūrīcā tojo weeticā'to. Ñubuetu'ajaca be'ropū todəporo niseti'caranojōta marāpū me'rā, nūmo me'rā niato tja. Tojo weeticā, wācūtutuaticā, wātī mūsārē ña'arō weedutibosami. Āpērā me'rā no'o ɥaro a'metārāma'acā weebosami.

⁶ Yũ'u mūsārē a'tere dutibutiase weronojō ucūgũ mejēta wee'e. Mūsā tojo weesī'rīcā, añurōsa'a nígũ, tojo ni'i. ⁷ Yũ'u a'tiro wācū'u. Yũ'u mūsā nipe'tirārē yũ'u weronojō nūmo marīrā nicā ɥamisa'a. Ō'acū pe'e masānucūrē na weepōtēoatjere cūucū niwī. Āpērārē nūmo marīdutigu o marāpū marīdutigu cūucū niwī. Āpērā pe'ere nūmotidutigu, marāpūtīdutigu cūucū niwī.

⁸ Ni'cārōacā mūsā nūmo marīrārē, marāpū marīrārē, wapewia numiārē nigūti. Mūsā yũ'u weronojō nūmotiticā, marāpūtīticā, añu ni'i. ⁹ Ɛmɥa numia me'rā nisī'rīrā nɥ'cātīrānojō nūmotiatio. Numia quē'rā mejārōta marāpūtiatio. Na nūmotīcā, marāpūtīcā, nemorō añu'u. Na numia me'rā, ɥmɥa me'rā nisī'rīrā, pi'eticā'to.

¹⁰ Yũ'u marāpūtīrārē, nūmotīrārē a'tiro duti'i. A'te marī wiogu dutise ni'i. Yũ'u tere were-turia'a. Numio co marāpūre cō'aticā'to. ¹¹ Cō'agō pūrīcā, apī me'rā nɥorēticā'to. Marāpū nīmī'cū

me'rã apotigo, ni'cõta tojato. Ƴmu quẽ'rã mejãrõta cũ nãmorẽ ne cõ'aticã'to. Cũ quẽ'rã cũ nãmo ní'co me'rã apotigu, mejãrõta tojato.

¹² Āpẽrãma, yu'u Jesucristo besecũ'cu nígu, yu'u wãcũsere a'tiro nigũti. Te wãcũse marĩ wiogu yu'ure bu'e'que mejẽta ni'i. A'tiro nigũti. Ni'cãrẽrã musã Jesucristore ãjõpeotigore nãmotibosa'a. Co mu'u me'rã ninu'cũsĩ'rĩcã, cõ'aticã'ña. ¹³ Mejãrõta ãjõpeotigure marãputigo quẽ'rã mu'u me'rã cũ ninu'cũsĩ'rĩcã, cõ'aticã'ña. ¹⁴ Na musã me'rã nise ye bu'iri Ō'acũ narẽ añurõ weesami. Tojo weerã musã põ'rã Jesucristore ãjõpeotirã põ'rã weronojõ nitisama. Ō'acũ musã põ'rãrẽ añurõ weesami. ¹⁵ No'o Jesucristore ãjõpeotigu cũ nãmorẽ cõ'asĩ'rĩgũnojo pe'e cõ'ato. Jesucristore ãjõpeotigo quẽ'rã co marãpũre cõ'asĩ'rĩgõnojo cõ'ato. Ō'acũ marĩ ãpẽrã me'rã a'mequẽse marĩrõ nisetiã uami. Na cõ'asĩ'rĩcã, añurõsa'a. ¹⁶ Cõ'ano'gõ "Yu'ure cõ'aticã, yu'u marãpũre Jesucristore ãjõpeocã weemasĩbopã", nita basiowe'e. Cõ'ano'gũ quẽ'rã "Yu'ure cõ'aticã, yu'u nãmorẽ Jesucristore ãjõpeocã weemasĩbopã", nita basiowe'e.

¹⁷ Tojo nimicã, a'tere yu'u nipe'tirocjãrã, Jesucristore ãjõpeori curuacjãrãrẽ duti'i. Musãnu'cũ Ō'acũ musãrẽ ne waro beseri curare niseti'caronojõta a'tiro nicã quẽ'rãrẽ niseti'roa'a. ¹⁸ Ō'acũ ni'cũrẽ õ'rẽcju yapa casero yejecõ'ano'cũre besebosami. Cũrẽ besecã, mejãrõta yejecõ'ano'cu niato. No'o yejecõ'ano'ti'cũre besecã quẽ'rãrẽ, mejãrõta

yejecō'ano'ti'cū niato. ¹⁹ Yejecō'ano'cū, yejecō'ano'ti'cū nise wapamarī'i. Ō'acū dutisere weese pe'e wapatiyu'rūnu'cā'a. ²⁰ Nipe'tirā Ō'acū besenu'cācatero ní'caronojōta ninu'cūcārōua'a. ²¹ Ō'acū da'raco'terārē besebosamī. Tojo besecā, mūsā da'raco'tesere wācūque'titicā'ña. Apetero mūsārē mūsā wiorā wijadutirāsama. Añu ni'i. Na tojo nicāta, wijabaque'oya. ²² Ō'acū marī wiogu Jesucristore ējōpeodutigū mūsārē besecu niwī. Mūsārē besenu'cācaterore da'raco'terā ní'cārā niwū. Ni'cārōacāma a'tiro ni'i. Tojo da'raco'terā nimirā, Jesucristo yarā nitjārā, da'raco'tesere wija'cārā weronojō ni'i. Cū ye cjasere da'ra'a. Āpērā quē'rā cū besenu'cārī curare da'raco'tetirā nicārā niwā. Ni'cārōacāma Jesucristore da'raco'terā weronojō nima. ²³ Ō'acū mūsārē ma'igū, cū yarā niato nígu Jesucristo wērīse me'rā wapayecu niwī. Tojo weerā masārē da'raco'terā weronojō niticā'ña. ²⁴ Ō'acū ne waro besenu'cācatero mūsā niseti'caronojōta niña tja. Cū yarā niña.

²⁵ Nūmo marīrā, marāpu marīrā pe'ema Jesucristo dutise marī'i. Tojo nimigū, no'o yu'u basu wācūse cārō mūsārē wereguti. Mūsā yu'ure ējōpeomasī'i. Marī wiogu yu'ure pa-jaña'se bu'iri tojo weemasī'i. ²⁶ Yu'u a'tiro wācū'u. A'tiro nicā peje pi'etise ni'i. Tojo weerā nūmo marīrā ní'cārā nūmotiticā'ña. ²⁷ No'o nūmotigupu ní'cū core cō'aticā'ña. No'o nūmo marīgū nūmotisī'rīgū a'maticā'ña. ²⁸ Mūsā nūmotirā, Ō'acūrē yu'rūnu'cārā mejēta

wee'e. No'o nu'mio quē'rā marāpūtigo Ō'acūrē yu'rānu'cāgō mejēta weemo. Tojo nimirō, catiri umucore peje pi'etise ni'i. Yu'u na tojo pi'etisere uasātimisa'a. Tojo weegu a'tere were'e.

²⁹ Acawererā, yu'u musārē a'tiro nisī'rīsa'a. A'tiro nicā peje pi'etise ni'i. Nemorō ña'arō wa'atjo cā'rō du'sa'a. Ni'cācā me'rā numotirā, numo marīrā weronojō tu'oña'ña. Musā numosānumiarē wācūnurūrōnojō o'orā, Ō'acū pe'ere wācūnurūdutiro, tojo wa'a'a.

³⁰ Dujasewā'a utiri masā bujawetidojaticā'ña. No'o e'catirānojō e'catidojaticā'ña. Musā apeque duusere musā ye warore weronojō tu'oña'ticā'ña. ³¹ A'ti umuco pe'tiwā'cārō wee'e. Tojo weerā a'ti turi cjasere uputu waro wācūticā'ña.

³² Musārē wācūque'tiro marīrō nicā u'a. Numo marīgū marī wioḡu cjasere pūrō wācūnurūsami. Jesucristo uasere weesī'rīsami.

³³ Numotigū pe'e cū numo añurō nicā uagū, a'ti umuco cjasere wācūnurūsami. Cū numo e'caticā uasami. ³⁴ Cū marī wioḡu uase quē'rārē weesī'rīsami. Tojo weegu cū weesī'rīse puaro ducawaanū'cōsami. Numia quē'rārē tojota ni'i. Marāpu marīgō marī wioḡu ye cjasere pūrō wācūnurūsamo. Ō'acū uaro dia'cū weesī'rīsamo. Co wācūsepū quē'rārē cū uaro wācūsamo. Marāpūtigo pe'e co marāpu añurō nicā uasamo. A'ti umuco cjasere pūrō wācūnurūsamo. Co marāpu e'caticā weesī'rīsamo.

³⁵ Yu'u musārē añurō wa'ato nīgū oja'a. Añurō nidutigū, marī wioḡu uaro dia'cū wee-

dutigu oja'a. Mũsãrẽ numotisere, marãputisere cã'mota'agu mejẽta, tojo ni'i.

³⁶ Ni'cũ cũ macõ mu'ñucã ï'agũ, a'tiro nibosami: "Yũ'ũ macõrẽ añurõ weetisa'a. Co marãputicã, añubosa'a", nibosami. Tojo nigũnojõ numisoato. Te tojo weese ne ña'arõ weese niwe'e. ³⁷ Apĩ pe'e "Numisoroũasato", nitibosami. Cũ tojo weesĩ'rĩse cãrẽ añu nibosa'a. "Yũ'ũ macõ marãputisome", nibosami. Cũ tojo nicã, core añurõ wa'arosa'a. ³⁸ A'tiro ni'i. Macõrẽ marãputiduti'cu añurõ weegu weesami. Marãputidutitigu pe'e quẽ'rã totá añurõ weeyũ'rũnũ'cãsami. A'tiro ni'i. A'tocatero pi'etise peje ni'i. Tojo weero marãputiticã, nemorõ añu ni'i.

³⁹ Marĩrẽ dutise a'tiro ni'i. Marãputigo co marãpu catiri cura cũ me'rã ninu'cũcã'to. Cũ wẽrĩca be'ro co no'o tũ'sagũnojõ me'rã marãputiato, ni'i. Co marãpu Jesucristore ãjõpeogu niato. ⁴⁰ Yũ'ũ pe'e a'tiro wãcũ'u. Co apaturi marãputitigo, nemorõ e'catibosamo. Yũ'ũ quẽ'rã ãpẽrã mũsãrẽ bu'erã weronojõ Espĩritu Santure cu'o'o. Tojo weegu tojo ucũ'u.

8

Wa'icũ di'i na queose yee'quere ãjõpeorã ñubuepeo'quere ba'asama nise ni'i

¹ Mũsã sãrĩtiña'quere yũ'tiguti. "¿Wa'icũ di'i na queose yee'quere ãjõpeorã ñubuepeo'quere ba'arouati?" nisere yũ'tiguti. Mũsã "Na ãjõpeose yee'quere wapamarĩ'i, tere masĩtoja'a", nisa'a. Tojota ni'i, nĩrõ. Tojo

nírã, a'tiro nírã weesa'a: “Ăpĕrã yu'ruoro masĩyu'rũnu'cã'a”, nima'acãrã weesa'a. Marĩ ģpĕrãrĕ ma'írã, a'tiro pe'e weesa'a. Nemorõ narĕ Ő'acũrĕ ĕjõpeocã weesa'a. ² No'o “Masĩyu'ruagu ni'i” nigũnojõ ne cã'rõ masĩtibusiacã'sami. “A'tiro wee masĩrõũasato”, nitisami. ³ Ő'acũ cũrĕ ma'igũ pe'ema a'tiro nisami: “Yagu nimi. Cũrĕ masĩ'i”, nisami.

⁴ Musã wa'icũ di'i ñubuepeo'quere ba'ase pe'e a'tiro ni'i. Musã nírõnojõta na ĕjõpeose yee'que wapamarĩ'i. Ăpĕrã Ő'acũ weronojõ nirãpũa ne marĩma. Cũ ni'cũta nimi. ⁵ Ăpĕrã cũrĕ ĕjõpeotirã pãjãrã ģpĕrãnojõrĕ ĕjõpeosama. Ő'mũarõpũ nirãrĕ, a'ti nucũcãpũ nirãrĕ ĕjõpeosama. Narĕ marĩ Ő'acũrĕ ĕjõpeoro weronojõ tũ'oña'sama. “Marĩ wiorã nima”, nisama. ⁶ Marĩ pe'e masĩno'o, Ő'acũ marĩ pacũ ni'cũta nimi. Cũ nipe'tise a'ti turi cjasere bajurĕcũ niwĩ. Marĩ cũ yarã cũ dutiro weejã ni'i. Tojo nicã Jesucristo quĕ'rã ni'cũta wiogu nimi. Cũ me'rã nipe'tise weeno'caro niwũ. Marĩ quĕ'rãrĕ cũ yarã sãjãcã weecũ niwĩ. Tojo weerã marĩ cũ me'rã ninu'cũcã'rãsa'a.

⁷ Ăpĕrã Jesucristore ĕjõpeorã, Ő'acũ ni'cũta nisere añurõ waro masĩyu'rũtĕrĩtisama. Na todũporopũre queose yee'quere ĕjõpeose bu'iri tojo nisama. Tojo weerã ni'cãrõacãrĕ ñubuepeo'que di'ire ba'arã, a'tiro nisama: “Tere ba'arã, queose yee'quere ĕjõpeorã wee'e”, nisama. Tojo weerã ĕjõpeotutuatirã ba'arã, bu'iritirã tũ'oña'sama. Tojo tũ'oña'mirã, tojo ba'acã'sama. Te me'rã na wãcũsere

dojorēsama. ⁸ Marĩ ba'ase, marĩ ba'atise quē'rã marĩrē Ō'acūrē nemorō ějōpeocã weewe'e. Marĩ ba'arã, nemorō añurã wa'asome. Ba'atirã quē'rã, ña'abutiarã wa'asome. ⁹ Tojo nimicã, añurō weeya musã. Apetero musã no'o ɯaro ba'ama'arã, apĩ añurō ějōpeotutuatiġure dojorēbosa'a. ¹⁰ A'tiro ni'i. Mɯ'u "Na ějōpeose yee'que wapamarĩ'i" ni masĩmigũ, na ñubuepeo ba'awɯaropɯ ba'agu wa'abosa'a. Apĩ ějōpeotutuatiġu pe'e mɯ'u tojo weesere ĩ'abosami. Mɯ'u ba'acã ĩ'agũ, "Queose yee'quere ějōpeogu weemi. Tojo weese ña'a ni'i", ni wãcũbosami. Tojo wãcũmigũ, mɯ'urē ĩ'acũugũ, cã quē'rã ba'acã'bosami. Tere ba'agu, "Ña'arō weegu wee'e", nibosami. Cã tojo wãcũse bu'iri mɯ'u cãrē ña'arō weegu wee'e. Tojo weerã añurō weeya. ¹¹ Mɯ'u masĩmigũ ba'agu, ějōpeotutuatiġu pe'ere dojorēgũ wee'e. Cristo cã quē'rãrē wēribosacu niwĩ. Mɯ'u ba'ase me'rã mɯ'u acaweregure dojorē'e. ¹² Mɯ'u ba'agu, Cristoreta ña'arō weegu wee'e. ¹³ Marĩ ba'ase me'rã marĩ acaweregũ ějōpeotutuatiġure dojorēbosa'a. Tojo weeri nírã, diacjũta ba'atiyɯ'ruocã'rõɯa'a.

9

Jesucristo ye quetiwereri masãrē na bu'ese wapa wapata'aba'amasĩsama nise ni'i

¹ Yɯ'u Jesucristo besecũú'cu ni'i. Āpērã cã besecũú'cãrã weronojō weemasĩ'i. Yɯ'u quē'rã marĩ wiogu Jesure ĩ'awũ. Tojo nicã musãrē marĩ wiogu quetire werewɯ. Musã

tere tu'o ějōpeowu. Tojo weerã yu'u Jesucristo besecúú'cu nisere masí'i. ² Āpērã yu'ure “Cũ Jesucristo besecúú'cu mejēta nimi”, nírã nisama. Mũsã pūrĩcã tojo niticã'ña. Yu'u mũsãrē Jesucristore ějōpeocã weewu. Tojo nicã mũsã cūrē ějōpeorãrē ni'cã curuata nerēque'acã weewu. Tojo weese me'rã yu'u cũ besecúú'cu nisere masí'i.

³ Āpērã yu'ure “Cũ Jesucristo besecúú'cu nitimi” nicã, narē a'tiro yu'tinu'cũ'u. ⁴ Yu'u Jesucristo besecúú'cu ni'i. Tojo weegu yu'u bu'ese wapa na ba'ase ecacã, sírĩse tĩacã, ñe'emasí'i. ⁵ Apeye quē'rãrē yu'u āpērã Jesucristo besecúú'cãrã, tojo nicã cũ acabijirã weronojō weemasí'i. Tojo nicã Pedro weronojō weemasí'i. Ni'cō numio Jesucristore ějōpeogore numoti, miamasí'i. ⁶ ¿De'ro wãcũti mũsã? Āpērã Jesucristo besecúú'cãrã cũ ye quetire wererã, da'ratima. ¿Ûsã dia'cũ Bernabé, yu'u, Jesucristo ye quetire wererã ba'acatisí'rĩrã da'radu'umasítisari? ⁷ Surara cũ ba'asere cũ basu wapayetisami. Cũ wiorã cūrē ecasama. Û'sere otegu te dũcare ba'asami. Oveja co'tegu quē'rã oveja õpēcõ me'rã wee'quere ba'asami. ⁸⁻⁹ Yu'ure “Masã wãcũse dia'cūrē weremi”, niticã'ña. Õ'acũ ye queti ojãca pūrĩpu Moisé Õ'acũ duti'quere a'tiro nicu niwĩ: “Wecu trigo ãrũagũ, tuumajãmisutuasami. Cũ ba'así'rĩgũ, ba'ato. A'tiro weeticã'to. Trigore ba'ari nírã, ɯseropu tuusãarĩ be'tore tuusãaticã'ña”, nicu niwĩ. Õ'acũ tere nígũ, wecua se'sarore wãcũticu niwĩ. ¹⁰ Cũ tere nígũ, ùsã cũ ye

quetire wererãrẽ queose o'osĩ'rĩgũ tojo nicu niwĩ. A'tiro ni'i. Di'tare se'ecũumũ'tã'cu, apĩ trigore ãrũagũ na ote'que ducare na puarã ducawaatjere wãcũyurã, da'rasama. ¹¹ Ɖsã musãrẽ Jesucristo ye queti wererã oteri masã weronojõ niwũ. Oteri masũ te otese ducare miisami. Tojo weerã musã Ɖsãrẽ apeyenojõ o'ocã, añu ni'i. ¹² Musã ãpẽrãmarĩcãrẽ tojo o'osa'a. Ɖsã pũrĩcãrẽ tjãsa'a.

“Ɖsãrẽ o'oya”, nĩmasĩ'i. Tojo nimirã, “O'oya”, ne niwe'e. Tojo nĩrõnojõ o'orã, su'tinojõ, ba'asenojõ moorã, tojo nu'cãcã'wũ. A'tiro wãcũwũ: “Marĩ sãrĩcã pe'ere, Cristo ye quetire Ɖatibosama”, ni wãcũwũ. Tojo weerã apeyenojõ marĩcã ĩ'arã, tojo nu'cãcã'wũ. ¹³ ¿Musã masĩweti? Ɖ'acũ wi'ipu da'rarã masã Ɖ'acũrẽ ẽjõpeorã ba'ase miiti cũu'quere ba'asama. Na wa'icũrãrẽ wẽjẽ Ɖjũamorõpeowuaropũ da'rarã, te di'ire ba'asama. ¹⁴ A'te weronojõ Jesucristo ye queti wererã quẽ'rãrẽ “Na te da'rase me'rã wapata'aba'ato”, nicu niwĩ marĩ wiogu. ¹⁵ Tojo nimicã, yu'u ne ni'cãti a'tere niticãti. Tojo nicã ni'cãrõacã quẽ'rãrẽ musãrẽ apeyenojõ o'odutigũ mejẽta tojo oja'a. Ɖjaboa wẽrĩmigũ, musãrẽ were'que wapa wapaseesome.

¹⁶ Yu'u Jesucristo ye quetire weregu, tere werese bu'iri “Ãpẽrã yu'ruoro añuyũ'runũ'cã'a”, niwe'e. Te yu'u da'rase ni'i. Yu'u tere wereticã, ña'arõ wa'abosa'a. ¹⁷ Tojo weegu yu'u Ɖaro me'rã weregu, wapata'abopã. Yu'ure were-dutisere weegu, Ɖ'acũ cũu'quere weegu wee'e. Cũ yu'ure wapayegusami. ¹⁸ Yu'u Jesucristo

ye quetire weregũ, wapata'aba'amasĩ'i. Tojo weeta basiomica, "Wapayeya", niwe'e. Yũ'u wapata'ase a'tiro ni'i. Jesucristo masãrẽ yũ'ruomi nise quetire weregũ, e'cati'i. Tere weregũ, wapaseewe'e. Tereta yũ'u wapata'a.

¹⁹ Masãrẽ yũ'u bu'esere tũ'oato nígũ a'tiro wee'e. Ne ni'cũrẽ da'rawã'ñaco'tegũ nitimigũ, nipe'tirãrẽ da'rawã'ñaco'tegũ weronojõ tũ'oña'a. Pãjãrã Cristo yarã sãjãcã uasãgũ, tojo wee'e. ²⁰ Judío masã tiropũ nígũ, na Jesure ãjõpeocã uasãgũ na weronojõta niseti'i. A'tiro ni'i. Judío masã Moisé dutise doca nima. Õ'acũ yũ'ure te dutise doca nidutitimi, nígũpua. Mejõ na Jesucristore ãjõpeocã uasãgũ yũ'u quẽ'rã na weronojõ Moisé dutise doca weronojõ ni'i. ²¹ Judío masã nitirã quẽ'rãrẽ Moisé dutisere masĩtirã, na Jesucristore ãjõpeocã uasãgũ na weronojõ niseti'i. Tojo nisetimigũ, "Õ'acũ dutisere weetigũ ni'i", niwe'e. Cristore ãjõpeotjãgũ, Õ'acũ dutisereta wee'e.

²² Yũ'u ãjõpeotutuaturã me'rã nígũ, na Jesucristore ãjõpeocã uasãgũ na weronojõta wee'e. "Masĩpe'ocã'a", niwe'e. Tojo weegũ nipe'tirãrẽ "¿Yũ'u de'ro weecã na yũ'rusĩ'rĩmitina?" nígũ, na weewuasenojõrẽta weeseti'i. ²³ Jesucristo ye quetire weregũ, na tũ'oato nígũ tojo wee'e. Cũ ye queti añuse ni'i. Yũ'u nipe'tirã tere masĩcã u'a. Jesucristo narẽ yũ'ruose yũ'u wapata'ase ni'i.

²⁴ A'tere queose me'rã were'e. Omawapata'ari masã nipe'tirã omasama. Nipe'tirã omamirã, ni'cũta wapata'asami. Mũsã tere masĩ'i. Mũsã

quẽ'rã nipe'tirã wapata'asĩ'rĩrã, wapata'ari masũ weronojõ omaña. Musãrẽ Õ'acũ o'otjere wapata'asĩ'rĩrã, cũ Ɂaro weeya. ²⁵ Nipe'tirã na omati dɁporo añurõ omabu'esama. Tojo weerã na queoro ba'asama. Na upure dojorẽsere weetisama. Na pũrĩ me'rã wéeca be'tore wapata'asĩ'rĩrã, tojo weeyusama. Ti be'to maata boadija wa'asa'a. Marĩ quẽ'rã Õ'acũ Ɂatisere, ña'asere du'urã, Õ'acũ yere wee'e. Cũ o'otje wapata'asĩ'rĩrã, tojo wee'e. Cũ o'ose ne pe'tisome. ²⁶ Tojo weegu yu'u omarĩ masũ weronojõ queoro wee'e. Wãcũtimigũ, tojo weema'awe'e. Yu'u weeatjere wãcũyu'u. ²⁷ Yu'u Ɂaro dia'cũ weewe'e. Ña'arõ Ɂaripejasere weewe'e. Wãcũtutua'a. Tojo weeticãma, Jesucristo ye quetire ãpẽrãrẽ werecã, Õ'acũ yu'ure "Añurõ weewu", nitibosami. Añuse yu'ure o'obo'quere o'otibosami.

10

DɁporocjãrã weronojõ weeticã'ña nise ni'i

¹ Jesucristore ẽjõpeorã, musãrẽ a'tere musã masĩcã Ɂasa'a. Õ'acũ Ɂsã Israe curuacjãrã ñecũsumua me'rã nicu niwĩ. Cũ o'óca curua o'mecurua me'rã na dɁporo Ɂ'mutãcu niwĩ. Nipe'tirã cãrẽ siruturã, pajiri maa aco sõ'arĩ maajo decopu pẽ'acãrã niwã. ² Na o'mecuruare sirutu'cãrã ti maarẽ pẽ'a'cãrã nipe'tirã wãmeyeno'cãrã weronojõ tojacãrã niwã. Te me'rã na Moisé yarã sãjãcãrã niwã. ³ Na nipe'tirã Õ'acũ o'o'que Ɂ'muse cjase maná

wāmetisere ba'acārā niwā. ⁴ Nipe'tirā aco Õ'acũ o'o'quere ũtāgāpɯ ní'quere sī'rīcārā niwā. Cristo ũtāgā aco wijaacaga weronojō nimi. Cũ na nipe'tirārē co'tegɯ, nipe'tiropɯ ba'patiwā'cācɯ niwī. ⁵ Narē tojo weemigũ, Õ'acũ pājārārē tɯ'saticɯ niwī. Cūrē yɯ'rɯnɯ'cācā ĩ'agũ, tojo weecɯ niwī. Te ye bu'iri na yucɯ marĩrōpɯ wa'arā, pājārā boabajaque'aticārā niwā.

⁶ Narē tojo wa'a'que marĩrē queose weronojō ni'i. Marĩrē na ña'arō wee'caro weronojō weedutitiro tojo wa'acaro niwũ. ⁷ Tojo weerā āpērā na yee'quere ējōpeoticā'ña. Todɯporocjārā weronojō weeticā'ña. Õ'acũ ye queti ojāca pūrĩpɯ wecɯ queosere ējōpeorā da're'quere a'tiro ojano'wũ: “Masā ba'a, sī'rīcārā niwā. Tu'ajanɯ'cō, na no'o ɯaro bosenuɯ nɯ'cācārā niwā.” ⁸ Marĩ na weronojō no'o ɯaro a'metārābajaque'atiticārā. Námarĩcā tojo wee'que wapa ni'cā nɯɯ veintitrés mil wērīcārā niwā. ⁹ Na marĩ wiogɯ Õ'acūrē ña'arō ucūcārā niwā. Õ'acũ marĩrē co'tetimi nírā, cūrē uacā weecārā niwā. Marĩ na wee'caronojō weeticārā majā. Námarĩcā tere wéerā, pājārā aña cū'rīwējēno'cārā niwā. ¹⁰ Tojo nicā mɯsā Õ'acũ me'rā na wee'caronojō tɯ'satirā, niticā'ña. Na tojo weecā ĩ'agũ, Õ'acūrē wereco'tegɯ ɯ'mɯsecjũ narē wējēcō'acɯ niwī.

¹¹ Õ'acũ marĩrē masĩdutigu narē tojo weecɯ niwī. Marĩ a'tocaterocjārārē a'ti ɯmɯco dujawā'cārō wee'e. Õ'acũ ɯporocjārārē bu'iri da'recɯ niwī. Te bu'iri da're'quere cũ ye

queti ojáca pūrīpū ojaduticū niwī. Marĩrē na weronojō ña'arō weedutitigū tojo weecu niwī. ¹² No'o “Yū'u pūrīcā añurō ējōpeo'o, ña'arō weesome” nigũnojo tū'omasīña. Apetero weegu mū'u ña'arō weebosa'a. ¹³ Apetero marĩ basu ña'arō weesĩ'rīsa'a. O apetero wātī marĩrē ña'arō weedutisami. Marĩ dia'cū mejētare tojo wa'a'a. Nipe'tirārē tojo wa'asa'a. Ō'acū pe'e cū “Weeguti” ni'quere weeticā weetisami. Cū marĩ ña'arō weesĩ'rīcā, nū'cāto nígū marĩrē weeta-musami. Tojo weerā marĩ ña'arō weebo'quere weewe'e.

¹⁴ Tojo weerā Jesucristore ējōpeorā yū'u mairā, mūsā na yee'cārārē ñubuepeoropū ne wa'aticā'ña. Tere ne cā'rō ējōpeoticā'ña. ¹⁵ Mūsārē masārē weronojō ucū'u. Mūsā basu yū'u ucūsere tū'oña'ña. ¹⁶ Marĩ pōtērīrā, sī'rīrī pa sī'rīse dūporo Ō'acūrē e'catise o'o'o. Ti pare sī'rīrā, Jesucristore bu'ipejatamu'u. Cū marĩrē wēribosagū, cū dí o'maburocū niwī. Tojo nicā pāgārē dūcawaa ba'arā, ni'cā curua, ni'cā upū wa'a'a. Tere ba'arā, Cristo curusapū wērī'quere bu'ipejatamu'u. ¹⁷ Marĩ pājārā nimirā, ni'cāgā cjase pārē ba'a'a. Tojo weerā marĩ ni'cā curua, ni'cā upū weronojō ni'i.

¹⁸ Israe curuacjārārē wācūña. Na Ō'acūrē ējōpeorā, wa'icūrārē ũjūamorōpeosama. Te di'ire ba'asama. Tere ba'arā, na Ō'acūrē bu'ipejatamusama. ¹⁹ Mūsārē a'tiro nigūti. Yū'u masā na yee'que pe'ema “Wapati'i”, nigū mejēta wee'e. Wa'icū di'i na yee'cārārē wējē ñubuepeo'que quē'rārē a'tiro nigūti: “Apeye di'i

weronojō ni'i", nigũ mejēta wee'e.

²⁰ Tojo nitimigũ, a'tiro ni'i. Ō'acũrē ějōpeotirā na yee'cārārē wa'icūrā wējē ñubuepeorā, wātīarē ějōpeorā weema. Ō'acũ mejētare ějōpeoma. Na tojo weecā, mūsā na me'rā nerē ba'arā, wātīa me'rā bu'ipejatamurā wee'e. Mūsā tojo weecā uawe'e. ²¹ Marĩ pōtērīrā, marĩ wiogũ ya pare sī'rī'i. Cũrē bu'ipejatamurā, cũ yere ba'a'a. Na yee'quere ñubuepeowuaroꝑũ cjase pe'e na o'ose te sī'rīse, te ba'ase wātīa ye ni'i. Tojo weerā mūsā marĩ wiogũre bu'ipejatamurā, cũ yere ba'arā, wātīa ye pe'ere ba'ata basiowe'e. Wātīa yere ba'arā, narē bu'ipejatamubosa'a. ²² Marĩ, wātīarē bu'ipejatamurā, marĩ wiogũ Ō'acũrē doecā weebosa'a. Cũ marĩ me'rā uacā, marĩ pōtēotisa'a. Cũ tutuagũ nimi.

Marĩ uaro dia'cũ wéerā, ãpērārē ma'itibosa'a nise ni'i

²³ Masā a'tiro ucũwuasama: "Marĩ weesī'rīsere no'o uaro weemasī'i." Tojota ni'i, nírō. Apeye marĩ weesī'rīse marīrē weetamutisa'a. Marĩ uaro wéerā, ãpērārē Ō'acũrē nemorō ějōpeocā weetibosa'a. ²⁴ ãpērārē añurō wa'acā uasārōua'a. Marĩ ye dia'cũrē wácũnũrũticā'rōua'a.

²⁵⁻²⁶ Ō'acũ ye queti ojáca pũrīꝑũ a'tiro ojano'wũ: "Nipe'tise a'ti turīꝑũ nise marĩ wiogũ ye ni'i", ni ojano'wũ. Nipe'tise ba'ase Ō'acũ wee'que ni'i. Tojo niyucā, nipe'tisere ba'amasī'i. Tojo weerā ba'ase duawuaroꝑũ duasere no'o uaro duuba'aya. Mūsā bu'iritirā tũ'oña'rī nírā,

“¿Na queose yee'cārārē ñubuepeo'que di'i niti?”
ni sērītiña'ticā'ña.

²⁷ Apetero weegu ni'cũ Jesucristore ějõpeotigu musārē cũ tiropu ba'adutibosami. Musã cũ tiropu wa'asĩ'rĩrã, nipe'tise cũ ecasere ba'aya. Musã bu'iritirã tu'oña'rĩ nĩrã, “¿A'te de'ro wee'que di'i niti?” ni sērītiña'ticā'ña. ²⁸ Topu nĩrĩ cura ni'cũ Jesucristore ějõpeogu musārē a'tiro nibosami: “A'te queose yee'cārārē na ñubuepeo'que di'i ni'i”, nibosami. Cũ tojo nicã, te di'ire ba'aticã'ña. Cũ musã ba'acãma, mejēcã wãcũbosami. Tojo wãcũticã'to nĩrã tojo weeya. ²⁹ Tojo nĩgũ, cũ wãcũsere ucũgũ wee'e. Musã wãcũse mejětare ucũ'u. Marĩ a'tiro nibosa'a: “Apĩ ña'arõ tu'oña'se bu'iri ¿de'ro weeacju yu'u weesĩ'rĩsere ducayubosau?
³⁰ Yu'u ba'asere Õ'acũrē e'catise o'ocã, ãpērã yu'u ba'asere mejēcã nĩmasĩtisama”, nibosa'a.
³¹ A'tiro ni'i. Marĩ ba'ase, sĩ'rĩse me'rã añurõ weecãma, añu ni'i, añurõ. Mejõ a'tiro ua'a. Nipe'tise marĩ ãpērãrē ějõpeocã weecã, añu nisa'a. Tojo weecã, nipe'tirã Õ'acũrē e'catipeorãsama. ³² Musã weese me'rã nipe'tirã Õ'acũ yarārē, judío masārē, judío masã nitirārē ña'arõ weecã weeticã'ña. ³³ Yu'u weronojõ weeya. Nipe'tise yu'u weese me'rã Õ'acũ yarārē añurõ weesĩ'rĩ'i. Nipe'tirã Jesucristore ějõpeocã uasãgũ na tu'sasere weenu'cũsĩ'rĩ'i. Yé pe'ere añurõ weesĩ'rĩwe'e. ãpērã ye pe'ere na yu'rucã uasãgũ wãcũnũ'ũ'u.

11

¹ Mũsã quẽ'rã yũ'u weronojõ weeya. Cristore yũ'u siruturonojõta yũ'ũre sirutuya.

Numia na ñubuewũaropũ weewũase ni'i

² Yũ'ũre mũsã wãcũcã, yũ'u bu'e'quere queoro weecã tu'ogu, e'cati'i. ³ Apeyenojõ mũsãrẽ masĩcã ũa'a. Cristo ũmũanũcũrẽ na dũpoá nimi. Ɛmũ pe'e numio dũpoá nimi. Ɛ'acũ quẽ'rã Cristo dũpoá nimi. ⁴ Ɛmũ Ɛ'acũ wi'ipũ ñubuegũ, cũ dũpoapũ su'ti caserore pesatisami. Tojo nicã Ɛ'acũ wereduti'quere wereturiagũ, pesatisami. Pesagu pũrĩcã, bopoyoro weegũ weebosami. Cũ tojo wéegũ, marĩ wiogu Jesucristore wiopesase me'rã ẽjõpeotibosami. ⁵ Numio pũrĩcã ñubuego, dũpoapũ su'ti caserore pesasamo. Tojo nicã Ɛ'acũ wereduti'quere wereturiago, mejãrõta weesamo. Co pesatigo, bopoyoro weego weebosamo. Ɛmũ weronojõ weebosamo. Co marãpũre, co wiogũre yũ'rũnũ'cãgõ weesamo. Poarire seecõ'a wũjaweeno'co weronojõ nibosamo. ⁶ Co pesaticã, diacjũta co poarire seecõ'a wũjaweepẽ'ocã'rõũa'a. Tojo weesĩ'rĩtigo, bopoyo ni'i nígõ, pesato. ⁷ Ɛmũ pe'e pesaticã'rõũa'a. Cũ Ɛ'acũ weronojõ wiogu nimi. Ɛmũ Ɛ'acũ wiogu nimi nisere ñ'omi. Numio pe'e ũmũ wiogu nimi nisere ñ'omo. Tojo weego co su'ti caserore pesarõũa'a. ⁸ Ne waropũ Ɛ'acũ ũmũrẽ wéegũ, numio ya õ'a me'rã weeticũ niwĩ. Numio pe'ere ũmũ ya õ'a me'rã weecũ niwĩ. ⁹ Ɛ'acũ numiorẽ ũmũrẽ weetamudutigũ weecũ niwĩ. Ɛmũ pe'ema

numiorē weetamuacjɥ mejētare weecu niwī.
 10 Tojo weerā numia mūsā nerēwuaropure
 nírā, su'ti caserore pesaroua'a. Tojo weego
 co ɥmua dutise doca nisere í'osamo. Apeye
 quē'rārē Ō'acūrē wereco'terā ɥ'musepɥ nírā
 co tojo weesere í'asama. 11 Tojo nimicā, marī
 Jesucristore ējōpeorā a'merī weetamu'u. Ɛmua
 numia weetamuse marīrō nímāsītisama. Numia
 quē'rā ɥmua weetamuse marīrō nímāsītisama.
 12 Diacjūta ni'i. Ō'acū numiorē ɥmɥ ya ō'a
 me'rā weecu niwī. A'te quē'rā diacjū ni'i.
 Ɛmua numiapure bajuasama. Nipe'tirā Ō'acū
 weeno'cārā dia'cū nima. Cū narē de'ro wee
 nisetiatiere weecu niwī.

13 ¿Mūsā de'ro wācūti? Numia na Ō'acū wi'ipɥ
 Ō'acūrē sērīrā, dɥpoapɥ su'ti casero pesaticā
 ¿añuti? Añuwe'e. 14 Nipe'tirā masīno'o. Ɛmɥ
 poanɥ'mo yoacā, bopoyo ni'i. 15 Numia pe'e co
 poanɥ'mo yoacā, añuyɥ'rua'a. Masīno'o. Co
 dɥpoare ma'masu'ago poanɥ'morē o'masamo.
 Su'ti casero pesago weronojō weesamo. 16 Yɥ'ɥ
 ucūsere “Tojo niwe'e” nigūnojōrē a'tiro nigūti.
 “Ɛsā, tojo nicā āpērā Jesucristore ējōpeorā apeye
 weesetisenojōpɥma masīnemoña marī'i”, nigūti.

Miinerēba'arā queoro weeti'que ni'i

17 Ni'cārōacā mūsārē apeye oja'a. Tere ojagɥ,
 “Añurō weerā wee'e”, nigū mejēta wee'e. Mūsā
 nerērā, añurō weeboronojō o'orā, mejō pe'e
 dojorēaporo. 18 Mūsārē a'tiro nimɥ'tāgūti. Mūsā
 nerēwuarā, dɥcawatisa'a. Mūsā tojo weese
 quetire tɥ'owɥ. Yɥ'ɥ tɥ'oña'cā, a'te queti
 diacjūta nisa'a. 19 Mūsā a'tiro ni wācūsa'a:

“Marĩ ducawatiwijaroua'a. Te me'rã ¿noa pe'e Jesucristo yarã waro nitito? nisere ñ'orãsa'a”, nisa'a.

²⁰ Musã ducawatise ye bu'iri miinerẽba'arã, marĩ wiogu cũ bu'erã me'rã ba'atuo'caro weronojõ queoro etiba'atisa'a. ²¹ Musã ba'ase miasere no'o uaro ba'anũ'cãsa'a. Pajiro ba'a, sĩ'rĩ, que'asa'a. Āpẽrã pe'e ba'atirã ujaboasama. ²² ¿Musã wi'seri mooti? Te wi'seripu ba'a, sĩ'rĩbosa'a. No'o uaro wéerã, musã nerẽwuasere wapamarĩ'i, nirã wee'e. Ba'ase moorãrẽ bopoyoro yu'rucã weerã wee'e. ¿De'ro nibosau musãrẽ? A'tere musãrẽ “Añurõ weerã wee'e”, niwe'e.

*Jesucristo cũ bu'erãrẽ su'ori ba'atuo'que ni'i
(Mt 26.26-29; Mr 14.22-25; Lc 22.14-20)*

²³ Yu'u musãrẽ bu'e'quere marĩ wiogu yu'ure bu'ewĩ. A'tiro ni'i. Jesú cãrẽ ñ'atu'tirãpure o'oatji ñamita Jesú pãrẽ mii, ²⁴ Õ'acũrẽ e'catise o'ocu niwĩ. Tu'ajanũ'cõ, tigare cũ bu'erãrẽ ducawaacu niwĩ. Be'ro narẽ nicu niwĩ: “A'te yu'u upu ni'i. Yu'u musã ye niatjere wẽrĩbosaguti. A'tiro yu'u ni'cãrõacã wee'caronojõ weenu'cũcã'ña. Tere wéerã, yu'u musãrẽ wẽrĩbosasere wãcũña”, nicu niwĩ. ²⁵ Na ba'áca be'ro sĩ'rĩrĩ pare mii, narẽ nicu niwĩ: “Musã ye niatjere yu'u wẽrĩgũti. Yu'u wẽrĩcã, yé dí o'maburorosa'a. Õ'acũ dũporopu musã me'rã 'A'tiro apoguti', nicu niwĩ. Cũ ní'caronojõta yé dí me'rã musã me'rã apogusami. Musã nipe'tisetiri ti pare sĩ'rĩsetirinucũ yu'ure wãcũña”, nicu niwĩ. ²⁶ A'tiro ni'i. Musã pãrẽ ba'arã, ti pare

sĩ'rĩrã, marĩ wiogu cũ marĩrẽ wẽrĩbosa'quere
ĩ'onu'cũrã wee'e. Téé cũ apaturi a'ticãpu musã
tojo weenu'cũcã'rãsa'a.

*Põtêrĩse dũporo marĩ weesetisere
wãcũmũ'tãdutise ni'i*

²⁷ Marĩ wiogu Jesucristo põtêrĩdutisere wiope-
sase marĩrõ pãrẽ ba'ama'agũnojõ, ti pare
sĩ'rĩma'agũnojõ bu'iri cuomi. Cũ wẽrĩsere, cũ ye
díre mejõ nise weronojõ tũ'oña'sami. ²⁸⁻²⁹ A'tiro
ni'i. Marĩ Jesucristore ãjõpeorã nerẽwuarã,
ni'cã curua, ni'cã upu ni'i. Marĩ wiogu ya upu
ni'i. Marĩ tere queoro wãcũtimirã, pãrẽ ba'a, ti
pare sĩ'rĩcã, Õ'acũ bu'iri da'resami. Tojo weerã
nipe'tirã marĩ põtêrĩati dũporo marĩ weesere
¿ña'arõ weecãti? nĩrã, wãcũmũ'tãrõua'a. Tojo
wéeca be'ropu pãrẽ ba'a, ti pare sĩ'rĩmasĩ'i.
³⁰ Musã tojo weetise ye bu'iri pãjãrã dutiti,
tutuatima. Ni'cãrẽrã wẽrĩatojama. ³¹ Marĩ
põtêrĩse dũporo wãcũmũ'tãcãma, Õ'acũ tojo
bu'iri da'retibosami. ³² Marĩ wiogu añurõ
weeato nígũ marĩrẽ bu'iri da'rewẽ'osami. Cũ
marĩrẽ, ãpẽrã cãrẽ ãjõpeotirã me'rã pecame'epu
wa'acã uatimi. Tojo weegu ña'arõ weesere
du'udutigũ marĩrẽ bu'iri da'rewẽ'omi.

³³ Tojo weerã, acawererã, miinerẽba'arã,
a'tiro weeya. Ni'cãrõ me'rã ba'arãtirã, yu-
cueya. ³⁴ No'o ujaboagũnojõ cũ ya wi'ipũ ba'ato.
Tojo weecã, Õ'acũ musã añurõ nerẽcã ĩ'agũ,
bu'iri da'reesome. Apeyema musã tiropu wa'agu,
apoguti.

12

Masānucš weemasīserē Espírítu Santu o'ose ni'i

¹ Acawererã, Espírítu Santu mūsãrẽ Õ'acũ yere weemasĩatjere o'omi. Mūsãrẽ tere queoro masĩcã ũa'a.

² Mūsã masĩ'i, Jesucristore ějõpeose dũporo masã yee'quere no'o ũaro ějõpeosirutucãrã niwũ. Na yee'que catise mejẽta nicaro niwũ. Ucũticaro niwũ. ³ Mūsã masĩticãrã niwũ. Te bu'iri a'tiro masĩcã ũa'a. Ne ni'cũ Espírítu Santure cũogũ Jesure a'tiro nímasĩtisami: "Pecame'epũ wa'abata'to", nímasĩtisami. Tojo ucũgũ pũrĩcã Espírítu Santu o'ose me'rã mejẽta ucũsami. Apĩ "Jesú marĩ wiogũ nimi" nígũ, cũ pũrĩcã Espírítu Santure cũomi. Espírítu Santu moogũ tojo nímasĩtibosami.

⁴ Marĩrẽ Espírítu Santu cũ weemasīse o'osere mejẽcã dia'cũ dũcawaasami. Tere Espírítu Santu ni'cũta o'omi. ⁵ Cũ o'ose me'rã marĩ wiogũ Jesucristo marĩrẽ mejẽcã dia'cũ da'radutisami. Tojo da'radutimigũ, Jesucristo ni'cũta nimi. ⁶ Cũ dutisere wéerã, mejẽcãrĩ dia'cũ weesa'a. Õ'acũ ni'cũta nipe'tirã marĩ weesere añurõ wa'acã weesami. ⁷ Espírítu Santu cũ o'ose me'rã marĩnucũrẽ cũ marĩ me'rã nisere ĩ'osami. Cũ o'ose me'rã marĩ nipe'tirã Jesucristore ějõpeori curuacjãrãrẽ a'merĩ añurõ weemasĩ'i. ⁸ A'tiro ni'i. Āpẽrãrẽ cũ masīse o'ose me'rã ucũme'rĩcã weesami. Āpẽrãrẽ mejãrõta cũ me'rã Õ'acũ ye queti ojãca pũrĩpũ oja'quere tu'omasĩ, wereme'rĩcã weesami. ⁹ Āpẽrãrẽ cũta tja

ējōpeoyu'rɯnu'cāsere o'osami. Tojo nicā āpērā dūtīrārē yu'rɯomasīsere o'osami. ¹⁰ Āpērā cū tutuaro me'rā añuse weeī'omasīsama. Āpērārē Ō'acū were'quere wereturiamasīsere o'osami. Āpērārē “¿Noa wātī me'rā nīsoo ucūti? ¿Noa Espīritu Santu me'rā diacjū ucūti?” ni besemasīsere o'osami. Espīritu Santu āpērārē apemasā yere masītīmirā ucūcā weesami. Āpērā na ucūcā masītīmirā, wereturiamasīsama. ¹¹ Espīritu Santu cū ɯaro cū o'osī'rīsere marīnɯcūrē dɯcawaasami. Marīrē mejēcārī dia'cū weesetiātjere dɯcawaasami. Cū ni'cū nīmigū, tojo weesami.

Marī pājārā nīmirā, ni'cā curua, ni'cā upɯta ni'i nise ni'i

¹² Marī upɯ ni'cā upɯ nīmirō, peje dɯcawati'i. Tojo dɯcawatīmirō, ni'cā upɯta ni'i. Cristo quē'rā tojota nīmi. Pājārā cūrē ējōpeoma. Na pājārā nīmicā, cū upɯ weronojō ni'cā curua cū me'rā nīma. ¹³ A'tiro ni'i. Marī cūrē ējōpeorā nīpe'tīrā judío masā, judío masā nītirā, āpērārē da'rawā'ñaco'teri masā, da'rawā'ñaco'tetīrā Espīritu Santu ni'cū me'rāta wāmeyeno'wū. Tojo weerā ni'cā upɯ ni'i. Marī nīpe'tīrāpɯta Espīritu Santureta cɯo'o.

¹⁴ Ni'cā upɯ peje dɯcawatisē cɯocā'a. ¹⁵ Marī dɯ'pocā ucūrī dɯ'pocā nīrō, a'tiro nībosa'a: “Omocā nīwe'e. Tojo weegɯ marī upɯ cjase nīwe'e.” Tojo nīse ye bu'iri dɯ'pocā upɯpɯ nīticā weewe'e. Topɯta wā'ña'a. ¹⁶ Marī o'mepero a'tiro ucūbosa'a: “Capea nīwe'e. Tojo weegɯ marī upɯ cjase nīwe'e.” Tojo nīse ye

bu'iri o'mepero upɔpɔ niticã weewe'e. Topɔta wã'ña'a. ¹⁷ Marĩ upɔ capeajo dia'cũ nicã, ¿de'ro wee marĩ tɔ'obosau? Marĩ upɔ o'meperojo dia'cũ nicã, ¿de'ro wee marĩ wĩjĩña'bosau? ¹⁸ Õ'acũ marĩ upɔre wee'cɔ pe'ema cũ ɛaro me'rã nipe'tisere queoro cũucɔ niwĩ. ¹⁹⁻²⁰ Ni'cã upɔ peje dɔcawatise cɔ'o. Tojo nimirõ, ni'cã upɔta ni'i. Peje dɔcawatise móórõ, ni'cã upɔ niwe'e. Marĩ Jesucristore ẽjõpeorã ni'cã upɔta ni'i.

²¹ Capea omocãrẽ “Mu'urẽ ɛatisa'a”, nímasĩtisa'a. Dupoa quẽ'rã dɔ'pocãrĩrẽ “ɛatisa'a”, nímasĩtisa'a. ²² A'tiro pe'e ni'i. Marĩ upɔ cjasere nipe'tisere ɛa'a. Marĩ upɔpɔre apeye mejõ nise ni'i. Tojo nimicã, te marĩcã, catimasĩtisa'a. ²³ Marĩ apeye upɔ cjasere mejõ nise tɔ'oña'a. Tojo weerã tere añurõ bajuato nĩrã añurõ apo'o. Apeye quẽ'rãrẽ masã ĩ'aticã'to ni, bopoyasãrã, su'ti sãñacã'mota'a'a. ²⁴ Apeye nemorõ añurõ bajuse me'rã pe'ema tojo weewe'e. Õ'acũ marĩ upɔ cjasere añurõ apocɔ niwĩ. Ni'cã upɔta añurĩ upɔ niato nígũ tojo weecɔ niwĩ. Marĩ mejõ nise tɔ'oña'senojõrẽ añurõ wãcũcã weecɔ niwĩ. Te weronojõ marĩ mejõ nigũ tɔ'oña'gũrẽ marĩrẽ añurõ wãcũcã weemi. ²⁵ Cũ tojo wéégɔ, nipe'tise marĩ upɔ cjasere ni'cãrõnojõ a'merĩ weetamudutigɔ tojo cũucɔ niwĩ. ²⁶ Marĩ upɔpɔre ni'cãrõ pũrĩno'cã, nipe'tiropɔ se'sa wa'a'a. No'o ni'cãrõ añurõ wa'acã, nipe'tiropɔ añurõ tɔ'oña'a.

²⁷ Tojo nígũ, a'tiro nigũ wee'e. Marĩ Cristore ẽjõpeorã cũ ya upɔ weronojõ ni'i. Marĩnacũ

cũ ya upɔcjarã ni'i. ²⁸ Õ'acũ marĩ upɔ cjasere đucawaacɯ niwĩ. Cũ tojo wee'caronojõ Jesucristore ẽjõpeori curuacjarãrẽ a'merĩ weet-amuatjere cũucɯ niwĩ. Ne waro Jesucristo besecũú'cãrãrẽ nipe'tirã bu'ipɔ besecũú'cɯ niwĩ. Na be'rocjarã Õ'acũ wereduti'quere wereturiari masãrẽ cũucɯ niwĩ. Na be'rore Õ'acũ ye quetire bu'eri masãrẽ cũucɯ niwĩ. Be'ro añuse, mejẽcã bajusere wee'orĩ masãrẽ cũucɯ niwĩ. Na be'rore dutitirãrẽ yu'rɔori masãrẽ, weeta-murĩ masãrẽ, tojo nicã dutiri masãrẽ cũucɯ niwĩ. Nipe'tirã be'ro apemasã yere masĩtimirã ucũrĩ masãrẽ cũucɯ niwĩ. ²⁹ Masĩno'o. Marĩ nipe'tirãrẽ mejãrõta weedutigɯ cũuticɯ niwĩ. Marĩ nipe'tirã Jesucristo besecũú'cãrã niwe'e. Nipe'tirã Õ'acũ ye wereturiari masã niwe'e. Nipe'tirã Õ'acũ ye quetire bu'eri masã niwe'e. Nipe'tirã añuse mejẽcã bajusere wee'omasĩwe'e. ³⁰ Nipe'tirã dutitirãrẽ yu'rɔomasĩwe'e. Nipe'tirã apemasã ye ucũsere ucũwe'e. Nipe'tirã na tojo ucũcã tã'otimirã, wereturiasĩwe'e. ³¹ Mũsãrẽ Espĩritu Santu cũ weemasĩsere o'ocãma, añuyu'rũasere beseyu'rũnũ'cãña. Yu'ũ mũsãrẽ a'te nipe'tise nemorõ añuyu'rũnũ'cãsere wereguti.

13

Ma'ise apeyenojõ yu'rɔoro añuyu'rũnũ'cã'a nise ni'i

¹ Marĩ apemasã ye ucũsere masĩtimirã, ucũmasĩbosa'a. Õ'acũrẽ wereco'terã ɯ'mũsecjarã ye quẽ'rãrẽ ucũmasĩbosa'a.

Tojo weemasĩmirã ãpẽrãrẽ ma'itirã, to'atũ o cõmepjĩrẽ no'o ɰaro paama'arã weronojõ nibosa'a. ² Apeyere Õ'acũ marĩrẽ were'quere añurõ wereturiamasĩbosa'a. Tojo weemirã ãpẽrãrẽ ma'itirã, tũ'omasĩtirã weronojõ nibosa'a. Tojo nicã nipe'tise masã masĩña marĩ'quere masĩbosa'a. No'o nipe'tisere masĩpe'ocã'bosa'a. Tojo masĩmirã ãpẽrãrẽ ma'itirã, tũ'omasĩtirã weronojõ nibosa'a. Marĩ ẽjõpeoyũ'rũnyũ'cãrã pũrĩcã, ỹrũgũrẽ aperopyũ wa'adutimasĩbosa'a. Tojo weeta basiomĩcã a'merĩ ma'ise móórã, mejõ waro ucũma'acã'bosa'a. ³ Marĩ cõose nipe'tisere pajasecũorãrẽ o'obosa'a. Marĩ narẽ ma'itimĩrã o'orã, tojo o'oma'acãrã weesa'a. Marĩ Õ'acũ yere weecã, cũrẽ ẽjõpeotĩrã marĩrẽ ỹjũadutibosama. Cũ yere weemirã ãpẽrãrẽ ma'iticã, Õ'acũ marĩrẽ “Añurõ weewũ”, nitisami.

⁴ Marĩ ãpẽrãrẽ ma'ĩrã, a'tiro wee'e. ãpẽrã marĩrẽ mejẽcã weecã, na weesere nyũ'cã'a. Nipe'tĩrãrẽ añurõ wee'e. ãpẽrãrẽ ɰowe'e. Mũsã ãpẽrãrẽ ma'ĩrã, a'tiro niwe'e: “Mũsã nemorõ añuyũ'rũnyũ'cãrã ni'i”, niwe'e. “ãpẽrã yũ'rũoro añurõ weeyũ'rũnyũ'cãrã ni'i”, niwe'e. ⁵ ãpẽrãrẽ ẽjõpeose me'rã ucũ'u. Marĩ ye se'sarore wãcũwe'e. Uamũñawe'e. ãpẽrã marĩrẽ mejẽcã weecã, yoacã uanu'cũwe'e. ⁶ ãpẽrã ña'arõ weecã ĩ'arã, e'catiwe'e. Na añurõ weecã pe'e, e'catitamu'u. ⁷ ãpẽrã na ña'arõ weesere ne cã'rõ wereturiawe'e. Na weesere añuse dia'cũrẽ ẽjõpeo'o. “Be'ropyũ añurõ weerãsama”, ni wãcũ'u. Nipe'tise ãpẽrã marĩrẽ ña'arõ weecã,

wăcūtutua'a.

⁸ Ma'ise pe'tisome. Ninu'cũcă'rōsa'a. Apeye Ō'acũ marîrē weemasîse o'ose pŭrîcă pe'tidijarosa'a. Be'ropŭ Ō'acũ cŭ yere wereturiamasîse o'ose quē'ră pe'tidijarosa'a. Nipe'tise cŭ yere masîpe'ocă'răsa'a. Apemasă ye ucŭsere masîtimiră Ō'acũ ucŭmasîse o'ose quē'ră pe'tirosa'a. Nipe'tiră ucŭse tŭ'ope'ocă'no'rōsa'a. Āpēră yŭ'rŭoro masîse o'o'que quē'ră pe'tirosa'a. Nipe'tisere masîrăsa'a. ⁹ A'tiro ni'i. Marî sŏ'owaro nipe'tisere masîpe'owe'e. Ō'acũ ye quē'rărē ni'cărēta weremasî'i. ¹⁰ Be'ropŭ Jesucristo apaturi a'tică, masîpe'ocă'răsa'a. Marî masîpe'ocăma, marî masîmi'que mejŏ nise tojarosa'a.

¹¹ Marî wî'mară nîră, na weewŭaronojŏ weewŭ. Bŭcŭră wa'ară, wî'mară weesere du'ucă'wă. Na wî'mară weese marîrē wapa-marî'i. ¹² Tojo weronojŏ a'tocatero marî aňurŏ masîwe'e. Ĕorŏ mejărŏpŭ marî î'ase weronojŏ ni'i. Queoro bajuwe'e. Be'ro bajuyoropŭ Ō'acŭrē î'arăsa'a. Ni'cărŏacărē marî că'rŏacă masî'i. Be'ro cŭ marîrē masîrŏnojŏta masîpe'ocă'răsa'a. ¹³ A'tiro nicărē ĕjŏpeose, e'catiyuse, ma'ise ni'i. A'te i'tiaro pe'tisome. Ma'ise pe'e apeye nemorŏ aňuyŭ'rŭnŭ'că'a.

14

Āpēră ye ucŭsere tŭ'otimiră ucŭră, a'tiro weerŭna'a nise ni'i

1 Āpērārē ma'isere wācūyurūnū'cāña. Tojo nicā Ō'acū Espíritu Santu me'rā weetamumasīse ũaya. Āpērā yere masītimirā ucūmasīse Espíritu Santu o'ose ni'i. Ō'acū yere wereturiamasīse quē'rā cū o'oseta ni'i. Cū o'osere wereturiamasīse ũaripejayurūnū'cāña. 2 No'o āpērā ye ucūse masītimigū ucūgūnojō Ō'acū dia'cūrē ucūsami. Masārē ucūtisami. Cū ucūse tū'otisama. Espíritu Santu tutuaro me'rā masīno'ña marīse ucūsami. 3 Ō'acū yere wereturiase pe'e masārē ucūse ni'i. Tere wererā, marī āpērārē Ō'acūrē nemorō ējōpeocā wee'e. Na e'caticā, wācūtutuacā wee'e. 4 No'o āpērā yere masītimigū ucūgūnojō cū se'saro Ō'acūrē nemorō ējōpeowā'cāgū weesami. Ō'acū ye quetire wereturiagu pe'e āpērā Jesucristore ējōpeorā nerēwūari curuacjārārē nemorō ējōpeocā weenemosami. 5 Musā āpērā yere masītimirā, nipe'tirā ucūmasīcā ũami'i. Te yurūoro Ō'acū yere wereturiamasīse pe'ere ũasāyurūnū'cāmi'i. Wereturiamasīgū pe'e apī āpērā yere masītimigū ucūgū nemorō wapatimi. Ni'cū āpērā yere masītimigū, ucūsami. Be'ro cū ucū'quere "A'tiro nisī'rīrō weepū", ni wereturiacā, añu nisa'a. Tojo weregū, nipe'tirā Jesucristore ējōpeori curuacjārārē nemorō ējōpeocā weesami. 6 A'tiro ni'i. Yū'ū musā tiropū wa'agu, āpērā yere ucūgū, weetamutibosa'a. Ō'acū yū'ure masīse o'osere bu'égu pūrīcā, weetamubosa'a. Musārē Ō'acū wereduti'quere wereturiagu quē'rā,

weetamubosa'a. Tojo nicã mäsãrẽ apeyere bu'ennemogũ, weetamubosa'a.

7 Ni'cã queose bususe cjasere o'oña'gũti. Wẽowũ no'o ɯaro putima'acã, ñe'enojõ basase nisari, nita basiowe'e. Buapũtẽrõ no'o ɯaro buapũtẽcã, ñe'enojõ basase nisari, nita basiowe'e. 8 Surara a'mewẽjẽrã wa'arã, na putipjũre queoro putiticã, na yere apoyutisama. 9 Marĩ quẽ'rã tojota nisa'a. Marĩ queoro ucũticã, de'ro nirõ weesari, nita basiowe'e. Mejõ waro ucũma'acã'bosa'a. 10 "A'ti nucũcãpũre pejetiacã ucũse ni'i", nita basiowe'e. Nipe'tise te ucũsenucũ tu'ota basio'o. 11 Yũ'ũ ãpẽrã ucũsere tu'otigu, aperocjũ weronojõ ni'i. Yũ'ũ apĩrẽ ucũcã, cã quẽ'rã tu'otigu, apesecjũ weronojõ nisami. 12 Tojota ni'i mäsã quẽ'rãrẽ. Mäsã Espĩritu Santu tutuaro me'rã weemasĩse o'osere ɯa'a. Tere ɯarã, a'tere ɯaripejayũ'rũnũ'cãña. Jesucristore ẽjõpeori curuacjãrãrẽ nemorõ añurõ ẽjõpeocã weemasĩse pe'ere ɯaripejayũ'rũnũ'cãña.

13 Tojo weerã no'o ãpẽrã yere masĩtimigũ ucũgũnojõ te ucũsere wereturiamasĩacjũ Õ'acũrẽ sãrĩato. 14 Marĩ ãpẽrã ye ucũsere tu'otimirã ñubuerã, Espĩritu Santu weetamuse me'rã ñubue'e. Tojo weemirã, "A'tiro nirã wee'e", nĩmasĩtisa'a. Tojo weerã ãpẽrãrẽ weetamutibosa'a. 15 Marĩ ñubuerã, a'te pũarore weerũa'a. ãpẽrã yere masĩtimirã ucũse Espĩritu Santu o'ose me'rã ñubuerũa'a. Tojo nicã marĩ wãcũse me'rã ñubuerũa'a. Apeye quẽ'rãrẽ Õ'acũrẽ basapeorã, mejãrõta pũaro

me'rã basapeorũa'a tja. Āpērã yere masītimirã ucūse me'rã, tojo nicã marĩ ucūse Ɂuseri me'rã basarũa'a. ¹⁶ Āpērã yere masītimirã ucūse me'rã dia'cũ mɁ'u Ō'acūrē e'catise o'ocã, apĩ mɁ'u ucūsere tɁ'otibosami. TɁ'otigu, “Tojota ni'i”, nitamumasītisami. ¹⁷ MɁ'u e'catise o'ocã, añu ni'i, añurõ pe'e. Cũ pe'ere Ō'acūrē nemorõ ějõpeocã weetisa'a. ¹⁸ Āpērã yere masītimigũ ucūsere yɁ'uta mɁsã nipe'tirã nemorõ ucūyɁ'rɁnɁ'cã'a. Tojo weegu Ō'acūrē e'catise o'o'o. ¹⁹ Tojo nimigũ, Jesucristore ějõpeorã nerẽwɁaropɁ mɁsã tɁ'otisere ucũcã, yɁ'u ucūse wapamarĩsa'a. Yoacã āpērã ye ucūse me'rã ucūmigũ, mejõ waro ucūbosa'a. MɁsã tɁ'otibosa'a. Cã'rõacã nimicã, masã tɁ'ota basiose me'rã ucũcã pe'ere, tetã mɁsārē añu ni'i.

²⁰ Acawererã, Jesucristore ějõpeorārē mɁsārē wereguti. Wĩ'marã tɁ'omasītima. Na weronojõ wãcũticã'ña. BɁcɁrã weronojõ wãcũsetiya. Wĩ'marã ña'arõ weesetitirã weronojõ wãcũña.

²¹ Ō'acũ ye queti ojãca pũrĩpɁ a'tiro ojano'wũ: “Marĩ wiogɁ Ō'acũ a'tiro nicɁ niwĩ: ‘Ějõpeotise bu'iri yɁ'u a'ti di'tacjārārē apemasã ye me'rã ucũgũti. Tojo weemicã, te me'rã quẽrārē ějõpeosome', nicɁ niwĩ.” ²² Tojo weegu Ō'acũ masārē apemasã ye me'rã weregɁ, masã ějõpeotisere, cūrē yɁ'rɁnɁ'cãsere ĩ'osami. Āpērã cūrē ějõpeorã pe'ere cũ ye queti wererã me'rã yɁ'ure ějõpeorã nima nisere ĩ'osami.

²³ MɁsã nipe'tirã nerẽwɁaropɁ apemasã yere tɁ'omasītimirã ucũcã, Jesucristore ějõpeotirã

sājāabosama. Na sājāejarā, musā ucūserere masītirā, “Maatirā weema”, nibosama. ²⁴ Musā nipe'tirā Ō'acū were'quere wereturiacā pe'ema, a'tiro weebosama. Jesucristore ējōpeotigu musā weesere ĩ'agū, “Yū'u ña'agū nisa'a”, ni tu'oña'bosami. ²⁵ Cū ña'arō wee'quere wācūejagusami. Tojo weegu Ō'acūrē ējōpeogu ejaque'agusami. “Ō'acū diacjūta na me'rā nimi”, nigūsami.

Musā weesere wiopesase me'rā weeya nise ni'i

²⁶ Acawererā, musā weesetise a'tiro ni'i. Musā nerērā, āpērā Ō'acūrē basapeosama. Āpērā Ō'acū cjasere bu'esama. Āpērā Ō'acū masīcā wee'quere wereturiasama. Āpērā, āpērā ye ucūserere tu'otimirā, ucūsama. Na ucūserere āpērā o na basu wereturiasama. Te me'rā nipe'tirā Jesucristore ējōpeori curuacjārārē a'merī Ō'acūrē ējōpeonemocā weeya. ²⁷ Āpērā ye ucūserere tu'otimirā ucūrī masā puarā o i'tiarāta ucūato. Ni'cū ucūmū'tā, be'ro apī ucūato. Na ucūserere apī wereturiato. ²⁸ Musā nerēwuaropu wereturiagu marīcā, ucūtiyu'rūocā'to. Na se'saro wācūsepū Ō'acūrē ucūato. ²⁹ Ō'acū weredutisere wereturiari masā quē'rā puarā o i'tiarāta wereato. Āpērā na weresere beseato. “¿Diacjūta niti?” niato. ³⁰ Ni'cū ucūrī cura Ō'acū apī topu dujigare wereduticā, ucūmū'tā'cū di'tamarīato. ³¹ Musā nipe'tirā Ō'acū wereduti'quere wereturiamasī'i. Tojo weerā ni'cū weremū'tā, apī, apī wereturiawā'cāña. Tojo weecā, nipe'tirā masīrāsama. Nipe'tirā wācūtutuarāsama.

³² Musã Õ'acũ weredutisere wereturiarã, no'o ɰaro ucũma'aticã'ña. Wãcũyu, "A'teta masãrẽ werecã, añutu'sa'a", ni wereya. Æpẽrã ucũrĩ curare ucũticã'ña. ³³ Õ'acũ queoro weecã ɰami. No'o ɰaro weesere ɰatimi.

Nipe'tirã Jesucristore ãjõpeorã nerẽrã, a'tiro weewɰama. ³⁴ Musã nerẽrĩ curare numia ucũtiyɰ'ruocã'to. Narẽ ucũdutiticã'ña. Ucũrõnojõ o'orã, Õ'acũ ye queti ojãca pũrĩpɰ duti'caronojõta añurõ yɰ'tiatio. ³⁵ Na tɰ'oti'quere masĩsĩ'rĩrã, wi'ipɰ na marãpɰsumarẽ sãrĩtiña'to. Numia Jesucristore ãjõpeorã nerẽwɰaropɰ ucũcã, tɰ'sawe'e.

³⁶ Musãrẽ masĩrõɰa'a. Õ'acũ ye queti musã me'rã nɰ'cãticaro niwũ. Musã se'saro tere ãjõpeorã niwe'e. ³⁷ No'o "Yɰ'u Õ'acũ yere wereturiamasĩ'i, Espĩritu Santu wãcũse o'ose me'rã ucũ'u" nigũnojõ yɰ'u ojasere "Marĩ wiogɰ dutise ni'i", nigũsami. ³⁸ Yɰ'u oja'quere ãjõpeotigure musã quẽ'rã cũrẽ ãjõpeoticã'ña.

³⁹ Acawererã, Õ'acũ yere wereturiamasĩsere ɰaya. Æpẽrãrẽ apemasã yere tɰ'otimirã na ucũcã, cã'mota'aticã'ña. ⁴⁰ Nipe'tise musã weesere no'o ɰaro weema'aticã'ña. Wiopesase me'rã weeya.

15

Jesucristo masã'que ni'i

¹ Acawererã, yɰ'u musãrẽ todɰporopɰ bu'e'que Jesucristo masãrẽ yɰ'ruose quetire ni'cãrõacã wãcũcã ɰa'a. Musã tere tɰ'orã, ãjõpeowɰ. A'tiro nicã quẽ'rãrẽ ãjõpeonu'cũ'u.

2 Õ'acũ te añuse queti me'rã musãrẽ ãjõpeonu'cũcã weegu weemi. Musãrẽ te queti yu'u were'quere ãjõpeonu'cũcã, yu'ruogusami. Queoro musã ãjõpeocã, tojo weegusami. Musã bu'ipu dia'cũ ãjõpeorã, yu'ruono'some.

3 Yu'ure bu'e'quere musãrẽ wereturiawu. Te apeye yu'ruoro niyu'rũnu'cãse a'tiro niwĩ. Õ'acũ ye queti ojãca pũrĩpu oja'caronojõta Cristo marĩ ña'arõ wee'quere cõ'asĩ'rĩgũ, wẽrĩbosacu niwĩ. 4 Cũ wẽrĩca be'ro cãrẽ yaacãrã niwã. Be'ro Õ'acũ ye queti ojãca pũrĩpu oja'caronojõta i'tia nũmu be'ro Õ'acũ cãrẽ masõcu niwĩ. 5 Tojo wéeca be'ro cũ Pedrore, ãpẽrã cũ besecũú'cãrãrẽ bajuacu niwĩ. 6 Be'ro ni'cãti pãjãrã quinientos yu'ruoro cãrẽ ãjõpeorãrẽ bajuacu niwĩ. Pãjãrã cãrẽ ã'a'cãrã catisama yu-jupu. ãpẽrã wẽrĩatojacãrã niwã. 7 Be'ro Santiagore bajuacu niwĩ. To be'ro nipe'tirã cũ besecũú'cãrãrẽ bajuacu niwĩ.

8 Be'ro nipe'tirã cãrẽ ã'aca be'ropu yu'ure bajuawĩ. Na be'rocjũ yapatiguacãpu baja'cu weronojõ nimigũ, cãrẽ ãjõpeosirutu'u. 9 Yu'u nipe'tirã ãpẽrã Jesucristo besecũú'cãrã docapu ni'i. Yu'ure ne cãrõ "Jesucristo besecũú'cu nimi", niticã'rõua'a. Yu'u Jesucristore ãjõpeori curuacjãrãrẽ ña'arõ wee'que bu'iri, tojo ni'i. 10 Tojo nimigũ, Õ'acũ yu'ure añurõ weeyucã, Jesucristo besecũú'cu ni'i. Yu'ure mejõ waro añurõ weegu weetimi. Yu'u nipe'tirã ãpẽrã yu'ruoro da'ra'a. Yu'u se'saro tojo weewe'e. Õ'acũ yu'ure añurõ wéegu, yu'u me'rã ninu'cũmi. Yu'ure weetamumi. 11 Yu'u

bu'ese, tojo nicã äpërã cû besecûú'cãrã na bu'ese ni'cãrõnojõ ni'i. Jesucristo wërĩ masã'que queti ùsã bu'ese ni'i. A'tereta musã ëjõpeowu.

Wërĩ'cãrã na masãmujãatje ni'i

¹² Æsã Cristo wërĩ masã'que quetire bu'ewu. Tere bu'emicã, ¿de'ro weerã musã ni'cãrërã “Wërĩ'cãrã masãtima”, nisari? ¹³ “Wërĩ'cãrã masãtima” nicãma, Cristo quë'rã masãtibopĩ. ¹⁴ Cû masãticãma, ùsã bu'ese wapamarĩbopã. Musã ëjõpeose quë'rã wapamarĩbopã. ¹⁵ Õ'acû Cristore masõcu niwĩ nise quetire werewu. Musã “Wërĩ'cãrã masãtima” nicã, ùsã te quetire wererã, nisoorã weebosa'a. Diacjũta wërĩ'cãrã masãticãma, Õ'acû Cristore masõtibopĩ. ¹⁶ A'tiro ni'i. Wërĩ'cãrã masãticãma, Cristo quë'rã masãtibopĩ. ¹⁷ Cürë masõticã, musã ëjõpeose wapamarĩbosa'a. Toduporo musã ña'arõ wee'quere mejãrõta acobocono'tirã nibosa'a. ¹⁸ Jesucristore cû pacu masõticãma, cürë ëjõpeorã wërĩrã, cürë ëjõpeotirã weronojõ pecame'epu wa'abosama. ¹⁹ “Wërĩ'cãrã masãsome” nise diacjũ nicãma, marĩ “Masãrãsama” nĩrã, marĩta äpërã yu'rũoro pajasecuorã waro nibosa'a. Mejõ waro ëjõpeoma'abosa'a.

²⁰ “Wërĩ'cãrã masãtima” nise diacjũ niwe'e. “Cristo masãcu niwĩ” nise pe'e diacjũ ni'i. Cristo äpërã nipe'tirã wërĩ'cãrã duporo masãmũ'tãcu niwĩ. Marĩ quë'rã wërĩ'cãrãpu masãrãsa'a. ²¹ A'tiro ni'i. Ne warocjũpu Adã ña'arõ weenu'cã'que bu'iri marĩ nipe'tirã wërĩdijarãsa'a. Be'ro Cristo añurõ weese

bu'iri wērī'cārāpū nimirā, masāmujāārāsa'a tja. ²² Marī nipe'tirā Adā pō'rā nise ye bu'iri wērīrāsa'a. Cristo yarā nirā pe'e marī cūrē ējōpeorā, catinu'cūrāsa'a. ²³ Marī masārā, queoro masārāsa'a. Cristo masāmū'tātojacū niwī. Be'ro cū apaturi a'ticā, marī cū yarā masārāsa'a. ²⁴ Tojo wa'acā, a'ti ūmūco pe'tia wa'arosa'a. Titare Cristo nipe'tirā wiorā tutuarārē, bajutirārē, bajurārē cō'ape'ocūsami. Cū tojo weetu'ajaca be'ro cū pacure cū nipe'tirā wiogū nisere wiagūsami. ²⁵ Tojo wiase duporo Ō'acū Cristore ĩ'atu'tirārē docaque'acā weegūsami. Tojo weegū Cristo nipe'tirā bu'ipū tojagūsami. ²⁶ Cristore ĩ'atu'tirārē docaque'acā wéeca be'ro wērīse quē'rā marīrōsa'a. ²⁷ Ō'acū cū ye queti ojāca pūrīpū nírōnojōta nipe'tisere, nipe'tirārē Cristo docapū tojacā weecū niwī. Tojo nírō, “Ō'acū Cristo docapū nimi”, nírō mejēta wee'e. Ō'acūta nipe'tisere, nipe'tirārē Cristo docapū tojacā weecū niwī. ²⁸ Ō'acū tojo tojacā wéeca be'ro Cristo Ō'acū macū, cū basu cū pacū doca tojagūsami. Tojo weegū Ō'acū nipe'tise, nipe'tirā wiogū nigūsami.

²⁹ Apeyere āpērā a'tiro weesama. Wērī'cārā ye wapa wāmeyebosadutisama. “Wērī'cārā masātisama” nicāma, tojo weeno'ña marībosa'a.

³⁰ Apeyere, ūsā bu'ese bu'iri nipe'tise nūmūrī āpērā ña'arō weesī'rīma. Tojo wiose wa'teropū nimirā, wērī'cārā masātjere wācūrā, bu'enu'cū'u. ³¹ Diacjūta yū'u musā marī wiogū Jesucristore ējōpeose ye bu'iri e'cati'i. A'te

quē'rā diacjūta ni'i. Nipe'tise numurī “Masā yu'ure wējērāsama”, ni tu'oña'a. ³² Yu'u Jesucristo ye quietire werese bu'iri Éfesocjārā yu'ure wa'icūrā yaiwa weronojō ña'arō weewā. “Wērī'cārā masāsoma” nicā, mejō waro na weesere pi'etibopā. “Wērī'cārā masāsoma” nise diacjū nicāma, marī quē'rā āpērā ucūwuaronojō ucūbosa'a. A'tiro nibosa'a: “Te'a ba'arā, te'a sī'rīrā. Maata wērīdojarāsa'a. Marī wērīati dūporo weewe'orā”, nibosa'a.

³³ Āpērā musārē mejēcā ějōpeoduticā, ějōpeoticā'ña. Masā ucūwūase a'tiro ni'i: “Ña'arā me'rā ba'paticā, añurō weese dojosa'a.”

³⁴ Tojo weerā tu'omasīña. Musā todūporo ní'caronojō wiopesase me'rā queoro weeya tja. Ña'arō weeticā'ña. Ni'cārērā Ō'acūrē masīwe'e. Musārē bopoyadutigā tojo ni'i.

Wērī'cārā masāmujāatjere werenemose ni'i

³⁵ Apetero ni'cū “Wērī'cārā masātima” nisere ějōpeogu, a'tiro sērītiña'bosami: “Wērī'cārā ĵde'ro wee masāta basiobosari? Na masārā, ĵde'ro bajuri upū cūorāsari?” ³⁶ Cū tojo sērītiña'ma'acā'bosami. Marī otese peri otecā, te peri pī'rīatji dūporo boadijasa'a. ³⁷ Marī pī'rīdutirā pī'rīmujā'cū mejētare ote'e. Te peri pe'ere trigo o no'o otese nisere pī'rīdutirā ote'e. ³⁸ Be'ro Ō'acū cū ũa'caronojō pī'rīcā weesami. No'o de'ro bajuse dūca ní'que tenojōta tja pī'rīcā weesami. ³⁹ Nipe'tirā catisere cūorā ni'cārōnojō bajurā nitima. Masā ye upū wa'icūrā ya upū weronojō bajuwe'e. Mirīcūa ya upū quē'rā mejēcā baju'u. Wa'i

quẽ'rã mejẽcã upõtima. ⁴⁰ A'te ducawatiro weronojõ u'musecjãrã quẽ'rã mejẽcã upõtima. A'ti di'tacjãrã mejẽcã upõtima. U'musepũ nirã añubutiari upũ cuoma. A'ti nucũcãpũ nirã quẽ'rã tojota cuoma. U'musecjãrã, a'ti nucũcãcjãrã weronojõ nitima. ⁴¹ Mujĩpũ umucocjũ ñamicjũ weronojõ, tojo nicã ñocõa weronojõ bo'reyutimi. Ñocõa quẽ'rã ni'cãrõnojõ bo'reyutisama. ⁴² ã'rã nipe'tirã weronojõ wẽrĩ'cãrã masãcã, tojo wa'arosa'a. Wẽrĩ'cãrãrẽ yaacã, na upũ boarosa'a. Be'ro ape upũ pe'titiatji upũ masõno'rõsa'a. Masõca be'ro apaturi wẽrĩnemosome. ⁴³ Marĩ mejõ nirĩ upũre yaa'a. Masãrõpũa tja ape upũ añubutiari upũ nirõsa'a. Marĩ tutuatiri upũre yaacõ'a'a. Masãca be'ropũre ape upũ tutuari upũ nirõsa'a. ⁴⁴ Marĩ a'ti upũre yaacõ'a'a. Masãca be'ro u'muse cja upũ pe'titiatji upũ nirõsa'a. Tojo weerã masĩno'o. Marĩ a'ti upũre cuorã, ape upũ pe'titiatji upũre cuorãsa'a.

⁴⁵ Õ'acũ ye queti ojãca pũrĩpũ a'tiro ojano'o: "Õ'acũ cũ weemũ'tã'cu Adãrẽ catisere o'ocu niwĩ." Cũ be'rocjũ Jesucristo pe'e catise pe'titise warore o'ogu nimi. ⁴⁶ A'ti upũ cjase catise marĩ cuomũ'tãse ni'i. Apeye catise be'ro cjase ni'i. Te u'muse cja upũ cjase pe'titiatje ni'i. ⁴⁷ A'ti nucũcãpũre masũ nimũ'tã'cu di'ta me'rã yeeno'cu niwĩ. Cũ be'rocjũ Cristo u'musecjũ nimi. ⁴⁸ A'ti di'tacjãrã ne warocjũ di'ta me'rã weeno'cu weronojõ upõtima. Jesucristo eẽjõpeorã pe'e u'musepũ wa'ajã u'musecjũ weronojõ upõtima. ⁴⁹ Adã di'ta me'rã yeeno'cu

niwĩ. Marĩ cã weronojõ upati'i. Mejãrõta be'ropu u'musecjũ Cristo weronojõ upatirãsa'a.

⁵⁰ Acawererã, a'tiro ni'i. Marĩrẽ a'ti upu me'rã u'musepu wa'ata basiowe'e. Boadijatji upu ni'i. Ti upu ninu'cũmasĩtisa'a. ⁵¹⁻⁵² Apeye quẽ'rã toduporo masĩno'ña marĩ'quere weregati. Nipe'tirã wẽrĩsome. Jesucristo a'tiri cura Õ'acũrẽ wereco'tegu u'musecjũ Õ'acũ yaro coronatare putigusami. Tojo wa'acã, umũnarõ cãrĩwã'cãmajãrã weronojõ marĩ nipe'tirã Jesucristore ãjõpeorã ape upu ducayurãsa'a. Wẽrĩ'cãrã ape upu pe'titiatji upu me'rã masãrãsama. Catirã quẽ'rã mejãrõta ducayurãsama. ⁵³ Marĩ ya upu boawuari upu pe'titiati upu wa'arosa'a. Ducayu, catinu'cũcã'rõsa'a. ⁵⁴⁻⁵⁵ Marĩ pe'titiati upu ducayucã, Õ'acũ ye queti ojãca pũrĩpu nĩrõnojõta wa'arosa'a. A'tiro ni ojano'o: "Marĩ wẽrĩsere docaque'acã weetoja'a. Ne apaturi wẽrĩnemosome majã. Wẽrĩrã pi'etisere tu'oña'some." ⁵⁶ Marĩ ña'arõ weese bu'iri wẽrĩrĩ masã ni'i. Te marĩ ña'arõ weesere Õ'acũ Moisére dutise cũ'que me'rã masĩno'o. Ña'arõ wéerã, marĩ pecame'epu wa'abopã. ⁵⁷ Tere cã'mota'agu, Õ'acũ pe'e a'tiro weecu niwĩ. Marĩ wiogu Jesucristo me'rã pecame'epu wa'abo'cãrãrẽ yu'rucu niwĩ. Tojo weerã Õ'acũrẽ e'catise o'orã.

⁵⁸ Acawererã, a'tere wãcũrã, ãjõpeonu'cũcã'ña. Marĩ wiogu yere siape me'rã nemorõ weenemoña. Musã masĩ'i. Cũ yere wéerã, tojowaro weebutiarã weewe'e. Wapati'i.

16

Corintocjārã Jerusalêpu nirārẽ niyeru o'orãtirã sêrĩneose ni'i

¹ Musã Jesucristore ãjõpeorãrẽ niyeru sêrĩneosema yu'u Galaciacjãrãrẽ duti'caronojõta weeya. A'tiro niwã:
² "Soorinũmurẽ nimũ'tãrĩ nũmũ semanarĩnũcũ musã wapata'aro ejatuaro apesepũ nũrõña." Musã tojo weeyurã, yu'u etari curapũ o'osĩ'rĩrã da'rama'acũñasome. ³ Yu'u musã tiropũ etagũ, musã beserãrẽ Jerusalêpu o'óguti. Narẽ o'ógũ, yu'u ojãca pũrĩpũre "Ã'rã nima Corintocjãrã bese'cãrã", ni ojaguti. Na me'rã ti pũrĩrẽ, tojo nicã niyerure Jerusalêcjãrã Jesucristore ãjõpeorãrẽ o'óguti. ⁴ "Yu'ũre wa'arõũa'a" nicãma, na yu'u me'rã wa'arãsama.

Pablo Corintopũ cã wa'atjere apoyuse ni'i

⁵ Yu'u topũ wa'agũ, Macedonia di'tapũ yu'ruagusa'a. To yu'rua, musã tiropũ etagusa'a. ⁶ Apetero weegũ musã me'rã yoacã nigũsa'a. Nipe'tiro pu'ecu nígũ, nipe'ocũsa'a. Be'ro, musã apero no'o yu'u wa'asĩ'rĩgũ wa'atjere weetamumasĩrãsa'a. ⁷ Yu'u musãrẽ mejõ waro ã'ayũ'ruwã'cãsi'rĩtisa'a. Marĩ wiogũ Jesucristo uacã, musã tiropũre yoacã tojasĩ'rĩsa'a. ⁸ Pentecosté bosenuũ nicã a'to Éfesopũ níniãgũti yujupũ. ⁹ A'tore peje da'rase ni'i. Pãjãrã marĩ wiogũ ye quetire tũ'osĩ'rĩma. Tere cã'mota'asĩ'rĩrã quẽ'rã pãjãrã nima.

¹⁰ Timoteo musã tiropũ etacã, cãrẽ weeta-mũña. Tojo weecã, cã wãcũque'tiro marĩrõ, bũjawetiro marĩrõ nigũsami. Cã yu'u weronojõ

marĩ wioꝝu yere da'rami. ¹¹ Tojo weerã musã cūrẽ mejõ waro i'acõ'aticã'ña. Cũ a'topu a'tiatjere weetamuña. Tojo weecã, cũ e'catise me'rã yu'u tiropu a'tigusami. Yu'u apẽrã Jesucristore ejõpeorã me'rã cūrẽ yucueꝝu wee'e.

¹² Apoloma yu'u uputu waro musã tiropu i'agũ wa'adutimiwũ. Cūrẽ marĩ acawererã me'rã wa'adutimiwũ. Cũ ni'cãrõacãrẽ wa'asĩ'ritimi. Cūrẽ wa'ata basiocã, be'ro wa'agusami.

Pablo Corintocjãrãrẽ añudutituo'que ni'i

¹³ Musã añurõ tu'omasĩña. Ejõpeodu'uticã'ña. Ne uiro marĩrõ niña. Tojo nĩrã, Õ'acũ tutuase me'rã niña. ¹⁴ Apẽrãrẽ ma'inu'cũcã'ña.

¹⁵ Ni'cãrõacãrẽ, acawererã, a'tere musãrẽ weresĩ'rĩsa'a. Estéfanas ya wi'icjãrãta niwã Acayapure apẽrã duporo Jesucristore ejõpeomu'tã'cãrã. Na Jesucristore ejõpeorãrẽ uputu waro weetamuma. ¹⁶ Na weronojõ weesetirãnojõrẽ na dutisere yu'tiya. Tojo nicã nipe'tirã Cristo yere da'rarã na dutisere weeya.

¹⁷ Musã me'rãcjãrã Estéfanas, Fortunato, Acaico a'topu ejacã, pũrõ e'catiwũ. Na musã yu'ure weetamubo'quere weema. ¹⁸ Yu'ure ejerisãjãcã weewã. Musã quẽ'rãrẽ tojota weerãsama. Tojo weerãrẽ “Añurõ weerã weema”, nirõua'a.

¹⁹ Asia di'tacjãrã Jesucristore ejõpeori curuacjãrã musãrẽ añudutima. Aquila, Priscila, na ya wi'ipu nerẽwuarã quẽ'rã Jesucristore ejõpeorã nitjãrã, pũrõ añudutio'oma.

²⁰ Nipe'tirã Jesucristore ejõpeorã musãrẽ añudutima. Musã e'catise me'rã a'merĩ añudutiya.

21 A'te nituose daripure musãrẽ añudutigu yu'u basuta oja'a.

22 No'o marĩ wiogu Jesucristore ma'itigure ña'arõ wa'ato. “Ûsã wiogu, quero a'tibaque'oya.”

23 Jesucristo marĩ wiogu musãrẽ añurõ weeato.

24 Marĩ nipe'tirã Jesucristo yarã ni'i. Tojo weegu musãrẽ uputu ma'i'i. Tojota wa'ato.

Tocã'rõta oja'a.

Pablo

**Õ'âkã hi yeere uúkũri turi Tukano
New Testament in Tucano (BR:tuo:Tucano)**

copyright © 2009 Wycliffe Bible Translators, Inc.

Language: Tucano

Translation by: Wycliffe Bible Translators, Inc.

Tucano [tuo], Brazil

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tucano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-12-01

PDF generated using Haiola and XeLaTeX on 22 Feb 2024 from source
files dated 31 Aug 2023

00ebd04f-7b0d-5a72-9407-eb53ae2bd086